

佛山忠義鄉志卷八

祠祀志一 凡二

官祀

敕賜靈應祠 敕封忠義流芳祠 烈士祠 報恩祠

忠勇祠 義烈祠

民祀

尊孔會 羣廟 里社 厲壇 寺 觀 各國教堂

洪範八政其三曰祀周禮掌之春官其在志書以延祐四明志祠祀門爲最善祠者廟之通稱分別官祀民祀祭法所載謂之祀典若非其封內之祭卽載在祀典亦屬民祀此古今通義也吾鎮官祀靈應祠爲重流芳祠亦同時鼎建皆特邀封典檔案可稽英烈所垂百世未墜於是報恩忠勇義烈諸祠相繼而起間或未登奏

佛山忠義鄉志卷八

祠祀一 一  
序例

報而以勞定國以死勤事例得建立專祠皆官祀也文廟大祀非民間所能私立而莘莘學子瞻拜惟虔官祀用丁祭民祀用誕祭本可並行不背治教休明實基於此中祀以下得援此爲例若是者謂之民祀其不在祀典者例應淘汰而民誠所寄屢獲休徵且經縣志收載自應照存里社本官祀而位秩次於羣廟故附焉鄉中多無主之祀俗謂之義祠卽古之厲壇爲祀事所應有因其教不易其俗可已儒無宗教之名而釋道則各標一幟於是乎有寺觀足增名勝亦滌塵囂故記載不廢道祖西去佛氏東來與耶蘇自西漸東各抱行教志願通商以來教堂林立在保護之列景教遺碑中外同寶自唐已然況在今日此又義在兼收者也綜斯而論宜有專編爰稽其類自官而民自中而外都爲一志題曰祠祀或故事有徵及建修碑記足備掌故者散附於後亦志例也子曰



務民之義敬鬼神而遠之可謂智矣斯則編志之用心也夫明有禮樂幽有鬼神民義既盡我用肇禋作祠祀志第八

敕封靈應祠 在祖廟舖祀真武帝祠之始建不可考或云宋元豐時厯元至明皆稱祖堂又稱祖廟以厯歲久遠且爲諸廟首也祠自明景泰三年始以神顯庇佛山威破黃賊特加敕封定春秋祀典有清因之舊傳祠之初立不過數楹至元末爲賊所燬則前此規模已無可據明洪武中鄉人趙仲修始修復之宣德中梁文縉等繼拓修之鑿灌花池於祠前已而霍時貴等再修建牌樓增鑿錦香池而廟貌乃寬整矣越百餘年爲崇禎時祠漸圯尙書李忠定遂大新之壯麗宏敞視前有加照壁飾以鳴吻益成鉅觀康熙二十三年李錫祚等復行修葺更覺巍煥云 陳志 自是以後代有增修均有碑記舊分題劄諭祭文御題扁聯祭器四項今照廟

佛山忠義鄉志卷八

祠祀一  
靈應祠

二二

志補勘合一道恭錄在前產及各碑記以次附

疏稿

廣東等處承宣布政使司左布政使臣揭

題爲激勸忠義事照得正統十四年八月二十二日有反獄強

賊黃蕭養糾合兇徒謀爲不軌而南海番禺等縣東涌馬寧等都俱各惶恐其中不肖多有投賊授僞官職管領賊眾攻圍廣東城池流劫鄉村殺害官軍良民彼時惟南海佛山耆民梁廣梁懋善霍伯倉梁厚積霍佛兒倫逸森梁濬浩洗浩通梁存慶何燾凱洗勝祿梁敬親梁裔堅倫逸安譚履植梁裔誠梁顥梁彝頰洗光何文鑑霍宗禮陳靖首倡大義率領當地八圖人民出備財力立木柵開溝塹利器械以爲防備之計後賊果至於是殺其僞官賊首彭文俊梁昇李觀奴生



擒張嘉積等賊黨憤怒聚船一千七百艘四面攻圍勢甚猖獗每遇敵時各人供給民夫酒食用大飛鎗摧破其車又鎔鐵水澆焚皮帳計謀迭出不能具述招撫各處被難人民動以萬計招徠撫恤卒以保全臣究其所以蓋彼處舊有神祠不知創於何代元季兵起鄉之神祠俱燬獨此祠人不敢犯故名之曰祖堂中奉

真武玄天上帝等神平居無事有禱卽應捷於影響有悖禮於祠下者輒使之狂病以驚懼之故鄉人事之甚謹賊起環境多被焚劫鄉人計無所出乃齋戒沐浴共謁於祠下祝以敵賊之故

神遂許之凡與賊對敵之時有海鳥結羣飛噪賊船之上又有聚蚊爲旗建立於榕樹之杪人馬彷彿馳於木柵之外由是羣

佛山忠義鄉志卷八

祠祀一 三  
靈應祠

賊數敗前後殺賊五千餘級斯皆神靈所助又有番禺縣人曹證任廣西田州府經歷丁憂回家守制因見賊起與民人李福全李善祥簡彥文亦倡大義立三大鎮保障居民一十三村人口萬計賊來輒殺敗之與倫逸等又俱各自備船隻率領民壯隨同大軍殺賊咸有勞績臣切惟大軍卽日肅將

天威殲厥渠魁餘黨殄滅殆盡軍民安堵如舊向非此二十二人保障鄉閭則賊徒益眾雖竟殄滅殺戮多矣臣謂秉忠仗義固臣民之當爲崇德報功乃

朝廷之大典至於

神靈顯應陰翼

皇度捍患禦災有功斯民理宜崇祀如蒙准題乞



敕該部議行有司將前項神靈新其廟宇

賜額褒嘉春秋致祭以答神庥及將曹證等併二十二人量加陞賞旌表其門永蠲其家雜派差征使天下之人曉然知忠義是尙非惟廣東之幸實天下之大幸也

景泰元年七月

日廣東等處承宣布政使司左布政使

臣揭稽謹

題奉

聖旨敕封爲靈應祠該部行有司歲時致祭其有功人員依例陞賞欽此

勘合

禮部尙書王 伏乞

聖恩褒嘉祀典護民神功事據都察院御史曾到部備言伏承發

佛山忠義鄉志卷八

祠祀一 四  
靈應祠

下查審臣民 奏疏內一款係廣東廣州府南海縣佛山堡者民倫逸安抱本齋 奏說本鄉北方玄武神祠其神酬應民卜捷如影響於正統十四年秋海賊黃蕭養生發聚眾萬餘劫掠鄉村脅民降服意欲叛謀各俱投服城門爲之謹閉田野不耕商旅不行賊以佛山爲奇貨得之以利器城可攻民可服資斧鎗銃可賴而繼戰船八百餘隻泊於汾水之岸鑼鼓喧天旌旗耀日民惶恐甚逃生無地鄉老誓血禱於神明願死堅守神現卦說許之鄉老卽率子弟鄉民一夜立柵衛於村外開塹護於柵外與賊守不願屈從屢與賊戰而屢勝其賊出戰之時常見一人青袍白馬走於柵外又見飛蚊團結成旗排陣遊於空中賊以北方揚灰欲傷民目霎時則轉南風吹之賊反自擊日夜鈴鑼不息民將億倦賊攻日甚



西北角柵城幾陷鄉老奔叩於神神卜許其勇敢民遂迎花  
瓶長五尺詭作大銃狀出誑賊賊疑不敢攻又見紅鳥一隊  
飛墜於海賊遂就擒黃賊剿除之後鄉無一人亡命此見神  
明保障之功赫赫威靈之助神靈顯應恩同再造者也伏乞  
聖恩褒嘉祀典等因都察院按行廣東道御史楊忠勘審繳報忠  
仰布政司參議陳贄委南海縣主簿李綱按臨佛山堡督會  
排年里老梁廣等僉同結狀果係神功維持生民安堵並不  
扶捏又恐附同不的復委經歷張應臣親臨覆勘鄉判霍佛  
兒鄉耆洗浩通呈狀果係神功持助各無異詞御史楊體得  
始末案卷如合符驗得以細備開具情由申奏伏蒙

聖旨准題着禮部議處本職依奉處議記記曰法施於民則祀之  
禦大災大患則祀之理合嘉崇隆以常祀申蒙允

佛山忠義鄉志卷八

祠祀一 五  
靈應祠

奏茲降以祭文一道扁額對聯各款議以果酒燭麪香帛卽發  
四百二十四號勘合劄付行廣東道御史歐陽承宣布政司  
參議合行州縣掌印官每歲供祭品物春秋離職親致祭祀  
用酬神貺毋致隳缺以負

朝廷褒崇之典如有隳缺許鄉民具呈上司坐以不恭之罪及廟  
宇朽壞務要本縣措置修葺毋致倒塌如有不悛事體仍許  
鄉老申呈有司轉行

奏治究不恕爲此議合通行責令府縣立案以憑查理庶祀典  
無窮須至帖者

景泰四年二月十四日行

禮部王花押

限五月十五日到

右四百二十四號勘合劄付



右題奏一道勘合一道載康熙靈應祠志有單擡雙擡字樣陳志止收題奏吳志並收勘合皆連文直書竊以敕賜封號爲萬世不易之典所有擡寫格式應照原文又祠志修於康熙癸未在縣志鄉志之前所載二十二義士名次與流芳祠天啟辛酉石碑相符策府流傳足補官書之闕用照祠志登載以備徵信而昭世守御題額聯祭文祭器附

又案題奏之文神廟等字均不擡寫原文真武立天上帝雙擡頭非當日公式惟廟志以廟爲主得援論祭文爲例尊王敬天義當並重故仍照原式庶不沒作志之用心昭祀典之隆重餘不爲例

明景泰御題匾額對聯

佛山忠義鄉志卷八 祠祀一 六 靈應祠

立靈聖域 牌坊

忠義靈應祠 正門

國朝祀典 前殿

忠義鴻名重地 正殿

捍患禦災今古英靈不泯 前殿

褒功賜額春秋享祀無窮

法界大開真武殿正直從人禱 正殿

神光普照兆民家奸邪不爾私

諭祭靈應祠祝文

維

景泰四年八月壬申朔越十五日丙戌廣東等處承宣布政使司廣州府知府南海縣知縣 欽承



上諭敢昭告于

靈應祠神維

神廟食南土肇宋元豐捍患禦災累著民績向茲盜發克副禱禳

寇用翦除實資

神貺王朝制祭於禮宜隆

特勅有司歲修常祀尙祈

景貺永福生民尙

享

按前明諭祭祝文陳志載在卷首上諭神貺等字俱雙擡實本祠志故照原文格式以光榮典嗣後遇祭期祇換寫國號年號月令日辰及主祭官名祝祠照原文不改

諭祭祭器祭品

佛山忠義鄉志卷八

祠祀一

七

靈應祠

研二卽湯孟用盛庶饑蔽羹

豆五有火燭者

鋪五圓而鼎足者

簋五方者

簋五圓而無足者

筐五竹器圓者

筥五竹器方者

盤五

爵三

豕一

羊一

齋供五

暈供五

熟供五

牲供五

餅供五

麪供五

京果鮮果各五

糖供五

請官主祭呈

具呈佛山堡甲排現年某等爲諭祭出自大典行禮懇委正官以



嚴對越以崇祀典事本堡靈應祠神有功民社向奉春秋致祭載  
在祀典至今率由舊章歷年皆係奉上憲委官赴祠行禮但從前  
多有河泊所陰陽學營代殊褻大典本月十五日恭遇祭期懇委  
任正官至期黎明行禮庶對越虔恭大典有光爲此呈赴  
本縣太爺台前伏乞作主金批施行

康熙四十五年八月

日呈

謁靈應祠

南海令

駱用卿 餘姚

異國奇香遇海龍萬家煙火見靈通時和明受春秋祀寇擾陰  
收保障功北極雲來庭外樹南天鶴返廟前風我來粵省人何  
識喜雨橫江慰野農

寇退志喜

梁 實 里人

鼠輩無端起戰爭經年烽火滿江城汾流旗幟連雲布王借干

佛山忠義鄉志卷八

祠祀一 八  
靈應祠

戈耀日明仰荷天威行殄滅故教神道播先聲從今作息安耕  
鑿共戴堯天樂太平

按駱用卿明正德朝任知縣距黃蕭養作亂不遠梁實詩  
有故教神道播先聲句亦爲靈應祠而作兩詩時代最早  
故次於公牘之後碑記之前

祀產序

竊惟

朝廷篤念真武神通顯聖護國救民浩翰功勳春秋祭祀未足酬  
報特行本縣盡蠲廟地糧差毋得徵擾刻碑遵守值廟工告成  
鄉判霍佛兒鄉耆梁文縉以廟前逼狹無以壯觀將已財合買  
洛水屯民地三畝五分其稅收入霍梁二戶就地鑿灌花池池  
上構梁以接中道從洛水尾官路脚起直至旗壘又有吳進  
捨田八分以弓步計之一百二十五步左右爲夾道池北種波  
羅梧桐池南種綠槐翠柳附近旗壘豎櫺星坊中題元靈聖  
域四字璀璨莊嚴猶如武當勝槩後有里人何康求嗣果應喜  
捨深村竈涌田七畝五分里人梁滔爲白沙步友人曾宗禮祈  
嗣生男曾萬餘同滔喜捨排後寶田五畝累至道士蘇碧真手  
上共田地七十六畝五分八厘遂以蘇碧真爲戶充本堡二十三  
畝第九甲甲首應納糧差前後事體炳備永記神功矣嘉靖三







祠原載戶稅八十三畝萬曆清丈始餘稅六十九畝此時侵佔已不可問矣凌復以癸亥清廟地而起海槎之訟後之聞者僉曰清則有禍而不問禍所由成以廟地為畏途任其侵佔結舌者又數十年春秋諭祭紳士罔聞即有遣官而上慢下暴襄神不堪其違神明蔑典制者甚矣癸亥之夏偶與南洲李君彝仲梁君熊子簡君翰章梁君圖章梁君避暑園林談及其事思欲肅清用慨然同志焉稽舊誌攷父老烈日披汗歷近地而訪之準時定租計歲八百餘金每祭集紳士里排豐筵盛陳祭器嚴對越拜舞飲福以彰朝廷德意歲租自辦糧兩祭之外留為鄉中大事支清祀田椿明四至寫載田形刪定舊誌付之剗使家傳戶曉經久永垂則尚侯董厥成之君子也余日企而望之康熙二十五年上元穀旦龐之兌東侶氏記

清復靈應祠租雜記

五帝之祀載于月令其一為黑帝黑帝者顓頊之神居水之位司冬之令而為大一之佐蓋周天之度三百六十有五而二十八宿為經北方七宿曰斗曰牛曰女虛曰危室壁象曰龜蛇謂之元武武者星形元者水形北帝者元武之精也吾粵星分牛女同隸北垣呼吸與帝座通由此言之神之為民捍災禦患成民忠義而為累朝崇報所由歸者禪山為粵巨鎮秀氣攸鍾故祖廟為靈獨顯其實帝之神在天有感斯通則正不必沾沾於祖廟也獨是廟貌由來已久而祀典載在春秋者又炳如日星則其本末始終誌之不可不詳曩者祀事歷久而做土田舖舍佛山忠義鄉志卷八

靈應祠

十

半入強侵賴龐李簡梁諸君子力為廓清癸未值事諸公嘉之實為文以敘其事而鄉飲一條亦屬同時修舉故並刻之其餘前後紀事碑文前明諭祭祝文及題扁額門柱對聯與夫眾當事題贈詩章概未授梓更有事而無碑者如李忠定公捐俸金數千重修殿宇當時勒石未就今文稿猶存他若附廟近地供祭土田雖各畧形而本自何人稅載何戶亦缺而未備凡此者皆不容泯滅是用忘其固陋勉搜羅凡夫一事一言有關於廟祭者莫不付之剗夫紀載明則神之威靈如見威靈見則承其下者皆生恭敬慕悅之心匪獨潔爾籩豆奉祀春秋已也行將顧名思義為臣思忠為子思孝為弟思悌為民思良力踐忠義之實以為明報國家幽格神明之本則人心風俗胥於焉係之今茲之役夫亦事之不容或已者也若夫神之顯靈於某年月日前朝諭祭至我朝諭祭於某年月日創廟於某年月日重修於某年月日則自有前人之言在今亦不復贅云康熙四十五年歲次丙戌臘月穀旦值事霍游鳳梁世美霍宗光陳紹猷李錫纘陳世瑛梁厥修梁應球洗元瑞李象水梁國珍羅世彥李炳球李泮陳一凱

按以上四十條陳志吳志並同又康熙間雜記兩篇亦屬

廟產故併為一類俾昭畫一道光以後力行樽節積置產

業租入有增光緒二十二年里人梁世澂按趾繪圖注說



刊本存大魁堂毋庸贅列

又按康熙五十九年有廟舖還廟碑示乾隆三年有儲廟

租建義學碑示另載鄉禁門

重建祖廟碑記

祭法曰法施於民能禦大災大患則祀之觀此則佛山之民崇  
奉祖廟不妄矣廟之創不知何代以其冠於眾廟之始故名之  
曰祖廟所奉之神不一惟真武為最靈其鼓舞羣動捷於桴鼓  
莫知其所以然當元季時羣盜蜂起有龍潭賊勢甚猖獗艦  
於汾水之岸欲標掠鄉土父老求衛於神是時天氣清明俄有  
黑雲起自西北須臾烈風雷雨賊艦幾盡覆溺境土遂寧鄉有  
被盜者叩於神盜乃病狂自賈所竊物歸其主復有同賈而分  
財不問者矢於神其昧心者即禍之其靈應多類此洪武間鄉  
耆趙仲修重建祠宇緣卑隘無以稱神威德宣德四年己酉士  
民梁文縉等廣其規模好善者多樂助之不終歲而畢丹碧焜  
耀照炫林壑復與洗瀨通率眾財買廟前民地百餘步鑿池植  
蓮號曰灌花池由是景槩益勝塘之稅文縉佛兒分承輸官其  
崇奉可謂誠至矣眾請記其事於石余謂神之像乃土木為之  
耳無言語可聞號令可畏而能使強戾者不得肆其暴昧心者  
不得遂其奸記謂法施於民能禦大災大患者神豈爽乎哉民  
之崇奉宜矣噫世之都高位享厚祿以保民為己任者求如神  
之為何不多見耶此陸龜蒙所謂纓弁言語之士木視神之為  
佛山忠義鄉志卷八 祠記一 十二

靈應祠

可不發愧而以善政自勵者歟文縉等所以勤勤懇懇而新是  
廟者蓋亦藉神之靈化人使咸歸於善耳厥志良可嘉也遂書  
於石俾後人知所崇奉云

宣德四年己酉邑人唐璧撰

慶真堂重修記

蓋聞天地之間道為最大三才之內人為最靈故聖神之德有  
以合造化致中和位天地而育萬物各得其所體物宰得而遠  
之乎恭惟元天上帝太陰之化水位之精職居四聖之中威鎮  
九天之下翦除妖怪迅秋令於雷霆快護善良沛春恩於雨露  
有求皆應無願不從本堂奉事香火世世相承建基之初不知  
何代也以為一鄉眾廟之始名之曰祖堂自前元以來三月三  
日恭遇帝誕本廟奉酬宴賀其為會首者不惟本鄉善士抑有  
四遠之君子相與竭力以贊其成是日也會中執事者動以千  
計皆散銷金旗花供具酒食笙歌喧闐車馬雜還看者駢肩累  
迹里巷壅塞無有爭競者豈非致中和之效乎大德之間廟前  
有榕樹二株被風吹頽鄉人聚以二百餘眾扶立不動是夜忽  
聞風雨聲次早樹起而端然豈非聖神之德驗乎名之曰聖榕  
元末羣盜蜂起時有龍潭賊來寇本鄉賊船數十艘於汾水之  
岸鄉人啟之於神是時天氣晴朗明俄有黑雲自西南既而狂風  
暴作飄賊船於江之北覆溺者過半望見雲中有神人披髮方  
知帝真救民於急難之中驅賊於過半望見雲中有神人披髮方  
將移神亦昇天矣賊乃買致守廟僧用暈穢之物竊汗神像遂  
入境標掠而廟宇聖榕俱為灰燼守廟僧不數日亦遭惡死迨  
我聖朝混一天下民安其生有鄉老趙仲修等節次鈔題重修



廟宇忽於小橋浦見水湧隨即一木躍出於淤泥之中濯如也  
眾以爲神稽之父老傳言其木係是創基之初雕塑神像之餘  
不敢毀以他用遂命良工雕刻聖像如故以奉事之祈求雨暘  
神現而用之乎遂命良工雕刻聖像如故以奉事之祈求雨暘  
時若百穀豐登保佑斯民以迄於今矣緣其棟宇卑狹未足以  
稱神光宣德四年己酉鄉之善士梁文縉出爲主緣化財重建  
其趨事赴工者不厭不怠經之營之畢年成之起工之夜廟前  
現一火毬大如車輪滾於地上光徹遠近倏然不見豎柱之日  
化緣中有不潔神責其傅匠者以言其過庚戌之秋九月朔日  
曙色初分之際廟前現一神旗風煙颯颯初濃漸淡隱隱不見  
丁巳歲六月十有七日現一白蛇蜿蜒之狀往來於棟梁之間  
鳥雀驚喧觀者漸眾遂隱於藻稅不見如此者皆神光不測之  
妙也何其盛歟別茲廟貌隘塞無以闡其勝覽正統元年丙辰  
歲主緣梁文縉等各出己財買廟前地一坵以步計之一  
百二十有五鑿爲灌花之池植以波羅梧桐二木於餘土之上  
其地稅糧則有梁文縉霍佛兒分承在戶以輸納之奠千載之  
下無以侵佔永爲本堂風水之壯觀也噫積善之家必有餘慶  
積不善之家必有餘殃豈不信哉近因鄰境有無知者妄借神  
織以前禱告而賊人陰懷畏懼修省之心遂生无妄之災將財  
以歸其主也又有同生理而財物不明誓之於神其瞞昧之  
皆有惡報以此彰昭報者非一難盡枚舉姑書此以記之  
正統三年春二月花朝前一日化緣見前  
靈應祠田頭事記自四化緣見前  
佛山忠義鄉志卷八

靈應祠

嗚呼莫爲於前雖善弗彰莫繼於後雖美弗傳是祠之建肇宋  
元豐禦災捍患賜額褒功瞻彼神明赫赫厥靈顧彼前修創造  
惟周祠成績著刻木傳流閱歷歲久慮其頹朽正德癸酉貴等  
會首竭力構材煥然重修流芳堂建爰及牌樓灌花池飾寒林  
所就六房改造三門新構廟貌增光輝映宇宙松柏森嚴四時  
雍秀永期壯觀民安物阜噫前之開惟今之繼實先後之人也  
若大明正德八年歲次癸酉孟冬吉日霍球撰文霍珪書丹陳諫  
篆額霍時貴張愷祠道士蘇澄輝立石

祖廟靈應祠碑記

南海縣佛山堡東距廣城僅五十里民廬櫛比屋瓦鱗次幾萬  
餘家書俗淳厚土修學業農勤耕稼工擅爐冶之巧四遠商販  
匝輻輳焉境內神廟數處有所謂祖廟者奉眞武上帝像因歷  
歲久遠故鄉人以祖廟稱之所謂祖廟者奉眞武上帝像因歷  
鄉之人奉之惟謹大明正統十四年己巳秋海賊黃蕭養初以  
行劫禁錮越獄亡命有司緩於追捕遂糾合惡黨剽掠村落擄  
貴貨焚廬舍追脅兵民從之爲逆弗從輒殺之聚其烏合之眾  
以數萬計舟楫塞川攻圍廣城而南海番禺諸村堡多有從爲  
逆者聲言欲攻佛山父老赴祖廟叩之於神以卜來否神謂賊  
必來宜蚤爲備於是耆民聚其鄉人子弟自相團結選壯勇治  
器械浚築壕塹豎木柵周十許里沿柵置舖凡二十有五每舖  
立長一人統三百餘眾刑牲飲血誓於神曰苟有臨敵退縮懷  
二心者神必殛之眾皆以忠義自許莫不慷慨思奮居無何賊  
果率舟數百至而其比鄰村堡從逆者皆視佛山爲奇貨破之



則大有所虜獲以充其欲是以四面環而攻之者晝夜弗休每當戰父老必禱於神許之出戰則戰必大勝斬獲不許則嚴兵防守不敢輕出賊夜遙見柵外列兵甚盛有海鳥千百為羣飛噪賊舟上又見飛蚊結陣自廟間出飄曳空中若旗幟形賊屢攻而屢敗之獲賊首級千數百計賊又造雲梯臨柵阻於溝塹不能前細眾擲火炬焚之賊計窮無如之何遂退兵二里許聯舟而營意將久任俟柵內食盡人憊不攻自破矣然佛山大家巨室藏蓄頗厚各出糧餉資給人皆飽食無慮賊中有自恃勇悍翹足向柵嫚罵者柵內火鎗一發中之即斃凡若此者鄉人皆以為神助也賊雖不復敢攻而相持累月弗退景泰改元四月十一日黃蕭養被擒就戮於廣城賊聞之夕散去蓋佛山故哉賊平後予與僉憲淮陽宮公安同出諸處村落招撫民之被寇流散者俾還復業因過佛山見其濠塹木柵與凡戰艦俱宛然在召其父老而獎勞之父老述神明靈應事甚詳悉子與宮公往謁祠下再拜瞻仰嗟歎久之諸父老請予為文記其事以示來世子歸而言於方伯揭公稽既而公以佛山耆民能保護境土及真武靈應疏聞於朝命下覆實而父老復詣予請記甚勤義不可拒因曰真武上帝昔我成祖文皇帝崇奉極隆重建武當宮觀至今選廷臣往彼護視罔闕而普天之下士庶之家奉侍是神者在在焉然其感通或有不同者何哉蓋在誠心之至否何如耳大抵動天地感鬼神不過一誠而已有其誠則有其神無其誠則無其神此理之自然也書曰至誠感神詎弗信乎惟爾佛山一境民庶之祖廟莫不極其嚴奉其來久

佛山忠義鄉志卷八

靈應祠

三

矣比劇賊臨境又能傾心叩禱厥誠不亦至乎神烏有不感通者哉宜乎靈應昭昭如是非偶然也且夫叛寇罪逆滔天荼毒生靈人神共怒朝廷命將以大兵四集賊尚不量力度勢自來送死安知非神明欲其亟亡而使之然耶嗚呼夫彼各鄉從叛黨類其父母妻子今皆安在而佛山一境晏然無恙室家相慶父子兄弟鄉黨族姻歡好如舊共享太平視彼作惡者相去豈特霄壤之懸絕而忠義之美名將互舌而不息矧諸父老殫心竭慮保全境土未常有德色希望之心而勤勤切切惟欲表彰神明之休烈以昭示遐永若此者皆可嘉也因為備書而詳錄之俾後之來者世世嚴奉毋有懈怠則神亦福汝庇汝於無極矣請文立石耆民名氏列之碑陰是為記會稽陳贄撰河南按察司僉事五羊趙純篆額廣西賓州知州南海鍾順書丹

重修靈應祠鼓樓記

景泰三年六月立

靈應祠之鎮忠義鄉也誠一方為甚萬古鉅觀其為右掖也有鼓樓焉源遠流長遷修遷圮迄今夕陽斜入碧草堆長殊深壁破垣頽之感其何以峙左右之鐘鼓而壯廟貌之形勝也余每徘徊環顧中心踴躍亟欲旦夕而鼎新之幸賴梓里同志者多咸樂捐輸得若而人合得金錢若干而遂庀材鳩工於五月十日名勒石永垂不朽之晦日告成實冲宇霍君之力居多焉肅次芳千秋亦好義終事之一斑云爾崇禎二年己巳月里人李待問

重修靈應祠記



昔人謂南海盛衣冠之氣者豈偶然哉說者謂地脈使然而不  
盡然也是必有神明之胄血食其間如解州之關夫子廟朱仙  
鎮之岳武穆廟是皆其神靈降綏禋祀茲土用能維千百年之  
命脈而俾國家長享有道於不窮吾鄉佛山舊為南海之冠凡  
庶茲字者咸獲鳩其保聚生齒日繁四方之舟車日以輻輳者  
則實惟帝之靈爽有以致之也其廟號祖堂以其歸然為諸廟  
首其神司北方之水是為立帝子自幼聞諸父老言帝之著異  
於吾鄉者不一獨於禦黃蕭養之亂為神最靈亦最奇後子服  
官於朝垂三十餘年累藉神床備員卿輔歲辛巳子以請告南  
還即謁神祠而見夫牆垣日久茅茨不除朱題漫滅又其堂廡  
湫隘雖日具燦盛備肥腩不疾瘵蠡而一拜一跪問得毋顧風  
雨而飄搖委神依於草莽乎因退而敬捐俸金謀所以為新厥  
廟貌者材取其庀工取其堅自堂徂基壯麗宏敞榜其殿曰紫  
霄宮外列牌樓復以其前為照壁飭以鳴吻是役也董其事者  
則有子姪述生從姪凡生經始於辛巳孟夏歷數月而工始竣  
由是而遊於廟中者遂有輪奐奕奕之觀焉而心亦云竭矣  
顧自念筮仕以來清白之衷久矣在帝左百今茲之役實荷神  
葉繼自今其惟帝昭明迄用豐年歲修禋以阜成我忠義荷神  
賜邦上翌聖主有道之靈長一鄉之福庇而巳哉因書其事於  
石以垂不朽云

崇禎十四年辛巳月里人李待問撰

南海廣郡附郭邑也所隸有佛山堡距會城五十里為上游地

佛山忠義鄉志卷八

靈應祠

一

連鄉接畛沃衍四達離鬱之水經於其北四方商賈之至粵者  
率以是為歸河面廣踰十尋而舸舶之停泊者鱗砌而蟻附中  
流行舟之道至不盈數武橈楫交擊爭沸喧騰聲越四五里有  
為郡會之所不及者沿岸而上屋宇森覆彌望莫極其中若縱  
若橫為衛為衙幾以千數闔閭層列百貨山積凡希觀之會  
城所未備者無不取給於此往來驛路駢踵摩肩塵肆居民盈  
踰十萬雖曲隧之狀無以過也其西一隅為地脈所由鍾有  
祠而顏曰靈應所祀為元天上帝聖歟之制大類唐宋以上蓋  
其所以權輿乎茲鄉者不知幾千百矣當明景泰中黃  
蕭養倡亂屠陷鄉邑郡南數百里堡落萬千無不為其所脅至  
於覆官軍圍郡縣鋒燭所至曾莫與樓而佛山四面列柵相拒  
故當之者無不披靡云事平後布政使揭公上其狀詔予祀典  
追崇禎時鄉人大司農李捐資重修制度視前稍擴矣惟祠前  
之地逼於民居湫隘特甚且厯代所捐送田畝為香燈奉者悉  
入中飽甲子之春鄉紳士龐之兒李錫簡等者老洗闇生何景  
純龐燕甫等發願重修設簿廣募祠前民舍高值買置牌坊廊  
宇株植臺池一森布望者肅然而几筵榱桷丹雘一新蓋廟  
貌於是成絕大觀而田畝舖舍咸就清理收其歲租以供祀典  
難之弊遂絕則紳耆繼事之勞不可沒焉然神之為道至幽杳  
山之民不啻如慈母之哺赤子顯赫之跡至不可殫述若佛  
何也豈以南方火地以帝為水德於此固有相濟之功耶抑佛  
山以鼓鑄為業火之炎烈特甚而水德之發湯亦特甚耶吾聞



上帝之祀有天下者之禮則然而茲下逮於氓庶母乃褻神而  
實其貺乎不知王者之祀郊天之大典氓庶之祀事天之實心  
也然則所謂上帝者一天而已矣萬物本乎天是則能事天者  
乃其真能事上帝者也佛山之民其庶幾乎故在五行則有相  
濟之用在人則有敬神之功帝之廟食乎茲土者豈偶然哉  
余備藩東粵百神之所主也故於落成序其事以誌之凡田若  
干畝舖舍若干椽土名若干處與首事之紳耆捐助之善信其  
名氏悉載於碑陰康熙二十三年歲次甲子口月立  
廣東承宣布政使奉天郎廷樞撰

昔晉記室郭景純留識於靈洲曰南海盛衣冠之氣當是時人  
物盛於江左粵隸屬遐陬乃若所云豈非靈氣所鍾善審氣機  
者豫得而券之耶夫氣之翕而聚也必有神焉守之氣之流而  
行也必有神焉宣之雖時有先後主之者惟神佛山鄉夙稱巨  
鎮亦一都會也其間四方之具貨商旅之輳集仕宦之往來絡  
繹於茲有神曰真武元帝保障功高不可殫述昔景泰間渠魁  
黃蕭養蜂擁流劫鄉邑或懼而倒戈此鄉藉神威鎮星旗赫濯  
望風披靡卒罹天誅有司疏厥厥功請封典救為靈應合州縣  
修祀典載在邑乘童叟至今紀之神廟食於斯據形勝之上游  
接靈洲之佳氣委蛇籓伏延袤百餘里特鍾靈於此維帝主焉  
初祠曰龍翥形家者言曰元武屬水龍得水而變化乃神爰鑿  
池於祠之南為錦香為灌花二池相表裏以瀦眾流之匯日久  
淤堙至今灌花為平壤矣錦香尚存茲以礪石繚以雕闌刻石  
佛山忠義鄉志卷八

靈應祠

為窺蛇狀引流植樹其間遊觀者有臨流眺望之樂日久池水  
漸涸兩潦時至四衢為之洋溢是坎離不交山澤之氣未通也  
爰議浚之由古洛社涌旁始結石渠引水而灌之池謀諸人  
曰可卜諸神神曰從質諸星厯形勝諸家僉曰吉用是釀金輸  
粟鑿土鳩工不數月而告成自是眾流之水以池為歸龍得水  
而神益靈龜蛇得水遂成其生日月星雲物得水而顯其精文  
詞之源學之海得水以成其文倚歟休哉神之在天猶水之在  
地也神之降福猶水之在下也挹之注之則覃而闕疏之淪之  
則流而行瀦之蓄之則停而平凡此皆人力之為亦神威之佑  
也工既竣將勒石以紀其事屬言於予予世居此鄉荷神庥底  
仰報無從茲舉也何敢遜謝爰捉筆而為之記里人洗煜撰此  
碑無年干

重修靈應祠記

西雍四時秦祀不聞黑帝子漢興高祖加祀北時五帝之名始  
著前代正統間神捍黃蕭養亂廟遂為吾鄉靈應祠諭祭春秋  
祀典勿絕宜哉歲三月都人士上巳賽神莫不虔恭飭事飲至  
廟中奉璋以告奉酒醴告奉粢盛告欽哉蓋各承靈一天觀備  
物之成有矣然年甲不再日月其除茲往事之易湮維廢興於  
吾黨變本加厲因故宇而光大之實子叔祖忠定公捐貲力新  
厥美而予家大人瑞映公亦捐貲任茲厥勞則廟石固存甯俟  
口碑傳信耶迄今世遠人違田漸併於豪強器或隳於世守予  
向憂之而力未逮藉緣首洗閭生諸公廣為募化而廟貌之剝  
蝕以新東侶龐公與同事六君子力為廓清而祭器之殘缺以  
飭庚午之役予親身勘丈而田土之湮沒以歸凡歲時哀對廟



中遂無不平不戒之慮焉今春吾弟公贊與值事諸公復恐其久而漫滅也於是圖諸剗劘囑予誌之首廟貌次土田次祭器夫鐘鼓集鯨音之震響用安神依樓臺肅貌座之高明聿毗聖壽覽入廟而生其敬者覽斯圖而可知已泰山之祀爰錫訪田保介之咨受釐上帝所以成民力而致於神也今而後其敢有率我蠶賊而蕩搖我疆里乎召虎平淮昭有功則錫爾珪瓚俾父南伐節孚金則彰爾鼎彝神為天子默佑斯民可無鐘懸之守也庶幾哉其無有譏挈瓶而悲失墜者矣余嘗俯仰百年間故嘉諸君子能相與有成與龐洗諸公之志無遺後先用其人子康所未逮者揚神床於罔替享國祀之無疆祚撰廟志

國家重修南海佛山靈應祠碑記  
則以水稱北方之神帝者哉吾鄉有靈應祠亦福民而享報况司天殷繁人物蔚盛倍加於疇昔非神之益昭其庇歟夫虔於事神用仰承聖天子敬神之德意此固官是地居是地者之所宜為奚敢有祀弗修有美弗飾也哉駐防司馬趙公觀斯祠之將頹慨然興修舉之志爰謀諸鄉之人士僉曰願如公觀斯祠之將頹趨樂事殆神之感孚者深歟其規度高廣仍舊無減增從青烏趨樂事也材則易其新良工必期於堅緻門庭堂寢巍然煥然非復向之樸略矣門外有綽楔則藻澤之綽楔前為歌舞臺則恢佛山忠義鄉志卷八

靈應祠

拓之左右恒舊連矮屋則盡毀而徹之但築淺廊以貯碑扁由是截然方正豁然舒窳與祠之壯麗相配其聖樂宮及祠右之觀音堂亦并修建圖整肅也於以揭虔妥靈其庶幾與夫神之祠徧天下獨是祠邀論祭之典故錫福無疆久乃彌著神若藉以報春秋禮饗之休命也然則余聞之棟宇輝煌余知神必陟鑿安居以綿威惠於是地焉爾抑余聞之棟宇輝煌余知神必陟鑿則量其可受惟慶神之新其祠即勉以自新其德則逐嘉祥而拜神賜必屬桑梓之吉人凡為國家之良士此則司馬公之所厚期於吾鄉者而非徒以重修修之觀也余曩修鄉志於祠事載之極詳亦欲鄉之父老子弟羣入祠而生敬隨發其仁義之馨香斯俗美風淳不負神君之保庇茲何幸新祠之益有以聳其目也余竊怵焉會值事諸君以記言見屬遂欣然振筆從之為次其槩以鐫諸石俾盛事傳於世世無窮云賜同進士出身翰林院庶吉士解元里人陳炎宗撰里人朱江書丹并篆額乾隆二十七年歲次壬午季秋吉旦值事彭金祈龔昭等立

儒者作事論理不論數而要事之成否則無非數也見為理所當為輒思奮然為之然或格於眾議或細於物力謀之而弗行助而其事迄用有成是大力者倡其說而眾莫違括其資而人樂乞假歸里旋蒙當事延為粵秀書院院長鄉事概弗暇為經理甲寅冬諸友向予言靈應祠祀北極鎮山真武上帝旁設神整安奉帝親前修廟時未之或易此扭於故習而莫之革也今議廟後子居中親乃旁坐理不順情不安甚非所以教孝也今議廟後



鼎建靈宮崇祀帝親各自為尊以正倫理予曰是宜勉為之矣  
既而事弗果成詢之眾僉曰志不一不可集事財不裕不可圖  
功予曰有其舉之存乎其人此中莫不有數焉君等姑以待之  
乙卯之冬司馬楊公名楷來署佛山同知象方子在諫垣風聞  
公為山東單縣宰卓有政績廉介之聲無間遠邇鋤強梗以植  
善良尤素志然也佛山夙為文物之區居斯土者類多醇雅顧  
商賈輻輳五方雜處寇攘奸宄恆惻惻其間恣強橫逞凶暴善  
良受毒者多隱忍而無所控告此匪黨之所以日肆行而莫忌  
也公至廉知其狀亟捕治之有以被害告者公即差拘立懲以  
法民無訟累公急於聽斷至不遑食初未嘗以勤勞憚也羣匪  
畏公明威潛為遁去然公究以劇賊不除則善良不保劇賊如  
陳迭舉等擒解速正典刑餘黨悉相繼捕獲凡各鄉往來道路  
奔走墟市率無復遭手刃而奪之金者矣佛山人更咸藉安  
堵故昔黃蕭養寇定佛山靈應祠神實為捍禦公計擒匪賊禱於  
神輒獲是神特附之以捍禦而感通冥漠有獨至也丙辰正月  
望日公詣祠焚香向鄉人士曰廟修自乾隆己卯於今三十餘  
年矣以起敬畏則神將宜裝飾也以肅觀瞻則棟柱宜刮摩也  
牆垣宜勦聖也捐俸金五十兩為之倡命鄉人士董其役眾因  
言於公曰前甲寅歲曾議建靈宮緣其地有數百年古樹人不  
敢議伐故眾志弗一兼乙卯之春米價日騰遂寢其說今修靈  
應祠其并建靈宮可乎公曰創別宮以隆享祀禮固宜然是鳥  
可以不以建遂出示諭重修靈應祠及鼎建靈宮諄切敷陳以此  
見公之留心風化也人廩公明示靡不響應而神更式憑焉二  
月十四夜天大兩以風厲後樹株大如合抱忽折其右偏折處  
佛山忠義鄉志卷八 祠祀一 十七

靈應祠

如刀切狀中一株枯而復萌大已盈拱俱被壓倒數十工人睡  
廊下者一無所傷一無片瓦墮地眾共異之翌日恭行論祀鄉  
人士以告於公公往視曰神之欲建此宮也其示諸此矣夫復  
何所疑焉聞之而往觀者殆不可以數計眾於是愈惕然於神  
之靈而倍加踴躍僉捐工費銀兩共九千七百有奇經始嘉慶  
元年二月至十有一月而落成余曰事之成也莫不有數焉此  
非其彰明較著乎是役也余雖廁名司事然鳩工庀材未嘗身  
任功不敢口即日有事於程材課工者亦不自以為能咸曰楊  
公能成民而致力於神神罔怨而罔恫也民奉令而承教也微  
揚公之力其奚能為此也繼自今入廟而觀金碧之輝煌觀瞻  
肅矣敬畏起矣宮分前後體統昭焉倫理正焉尊尊親親之義  
明矣楊公之功亦偉矣哉爰悉書之俾鐫諸石里人陳其焜撰  
里人李可端書 嘉慶二年丁巳仲冬

右碑記十二篇康熙前十篇陳志附祀產後吳志改隸金

石門按諸碑記有關廟制沿革故復陳志之舊仍照吳志

以年代為次乾隆後一篇照吳志收入

又按諸碑記以景泰二年陳志一碑為最古其餘各碑有

足備佛山掌故者如宣德四年唐璧碑敘元末龍潭賊犯



佛山被鄉夫擊退事正統二年重修慶真樓碑述聖榕植地神木湧水火球照夜白蛇繞梁事景泰二年陳志碑補述黃蕭養造雲梯壓柵及擒殺黃蕭養事嘉慶二年陳其焜碑述分府楊楷擒賊及建築後殿惡木自削不傷一人事皆與神靈相感應與敷衍故事僅記工程用數捐修名氏者不同故悉照舊志登錄舊列金石門今附本祠後以類從也又廟門首李忠定公榜聯云鳳形湧出三尊地龍勢生成一洞天事關掌故與諸碑同故補錄於此咸豐四年甲寅重修有碑款識闕

光緒己亥年重修同知劉國光撰記并書

又里人梁爾燊撰記

以上三碑均樹祠內文不備錄

北帝廟一在醫靈舖石角涌邊又名真武廟嘉慶壬戌修一在橋亭舖富榮里一在明照舖鳴沙咸豐元年重修

佛山忠義鄉志卷八

靈應祠

六

在汾水舖龍袍街康熙丁亥重修附祀明太子少保禮部尚書文敏霍公額題容臺儼若一在汾水舖舊肇慶渡頭一在

汾水舖鹽倉馬頭

按以上各廟由各舖公建比之行宮故以次附

聖樂宮在祖廟舖營前街八畝祖祠之右八畝公建為排甲辦公之所光緒三年重修洗寶楨有記

重修聖樂宮記

佛山堡名爾鄉則曰忠義鄉地以人傳也然則畝甲何重乎爾雜記何紀乎爾曰徹田為糧三壤成賦出賦稅以給公上下之所攸繫也昔漢高至咸陽鄧侯收丞相府圖書具知天下阨塞戶口多少畝甲顧不重乎哉我佛山畝甲肇自有明洪武其法實倣成周比閭族黨之相維出入守望之共濟昔人所以供上睦鄰之規法良意美然迄於今五百有餘歲矣歷年久遠遺澤浸微文獻之存闕有間矣光緒丁丑八畝同人以辦公無萃會處議葺聖樂宮以為八畝公所同人伙助集腋成裘施勳聖緒廚竈置窗櫺建柵欄由是而安神明辦公事允稱得所矣事竣僉曰葺之誠是也莫為於前雖美弗彰莫為之後雖盛弗傳我畝甲羣萃而州處非其親戚則其故舊久推為是邦士著矣蓋述舊聞臚其始末筆於冊以備將來文獻可乎眾曰可此公項雜記之所以錄也噫嘻數典不忘其祖居斯土者詎可忘忠義之名乎為畝甲者詎可緩供上之職乎世篤忠貞願名思義正供無誤終事勿遺願與諸君子共勉之而已是為序



光緒丁丑仲冬里人洗寶楨撰  
佛山堡八景里排同立

按粵俗各廟無論天神地元俱供有聖親牌位謂之聖父聖母殊不可解靈應祠後樓亦奉聖親習俗相沿久矣然推萬物本乎天之義星辰麗於天是天亦星辰之父母也樓上有聯云太極本無極玄天上有天立言頗為得體聖樂宮八景公建排甲辦公之所以祠祀名故附靈應祠後忠義流芳祠 在祖廟舖靈應祠右明正德八年建奉祀忠義官梁廣等二十二人靈應祠制平排五門正中三門為靈應祠東便門為崇正社學內有大魁堂祀烈士霍仲儒禦蕭養時死難者也西便門即流芳祠其時距正統己巳六十四年諸義士皆物故鎮人遂建祠以祀上官撥正二餉渡一額又由靈應祠撥排後寶舖一間以供祀事均給示勒石載鄉禁門神座後石碑一道刊載諸

佛山忠義鄉志卷八

祠祀一  
流芳祠 九

義士名號里居維嚴維翼重修於天啟三年辛酉自是代有增修皆由靈應祠撥款協助忠義祀典載在祭法闔鎮所瞻仰與忠義鄉並垂不朽祀位碑及各碑記備列如左

祀位碑

南園梁公諱 廣 世居梨巷

天啟辛 柏庭梁公諱懋善 世居黃礪忠義里

酉重修 隔塘霍公諱伯倉 世居隔塘霍畔坊

雅淡梁公諱厚積 世居澳口

松莊霍公諱佛兒 世居祖堂邊

忠 東皋倫公諱逸森 世居巷心

東圃梁公諱濬浩 世居水蓼頭

月松洗公諱灝通 世居鶴園



義

懶雲梁公諱存慶

世居晚市廟邊

笑波何公諱燾凱

世居柵下北邊坊

鴻道洗公諱勝祿

世居白礪頭

梅軒梁公諱敬親

世居石獅里

流

松塘梁公諱裔堅

世居岡頭松梓堂坊

東墅倫公諱逸安

世居巷心分居涌口

居易譚公諱熙

字履禎世居六村

筠軒梁公諱裔誠

世居岡頭樓屋

芳

翠軒梁公諱顯

世居墟步街岡頭

蓮溪梁公諱彝頰

世居岡頭分居新基

東潭洗公諱光

世居東頭

中秋鼎

淇園何公諱文鑑

世居柵下

佛山忠義鄉志卷八

祠祀一  
流芳祠

三

建立石

禮翹霍公諱宗禮

世居山紫村

東林陳公諱靖

世居舊早市高地坊

康熙十二年歲次癸丑臘月吉日重修

右二十二老梁廣居首以次順序舊志未載里居名次亦

有參差今照神座後石刻依次備列以碑記三篇附梁廣

梁懋善霍伯倉梁厚積霍佛兒洗灝通洗勝祿梁敬親梁

顯梁裔誠梁彝頰洗光霍宗禮皆有傳在忠義門

世濟忠義記

余嘗稽古之人所以制大敵弭大難未有不因甲兵據險塞居得意之位操能致之權者及其論功於朝則必晉殊秩膺顯號銘之旂常藏之金匱石室死則廟而祀之不以爲異其有功不受賞者蓋寡惟夫禍變起於倉卒而當其時與地無甲兵之援



無險阻之限而又無得意之位能致之權彼豪傑者出其間不  
忍坐視其危莫之救徒以其忠義之所激發能使阡陌耒耜之  
輩奮而爲精兵而大敵破咆哮嘯聚之徒化而爲良民而大難  
平其成事之難槩夫有所憑藉者功相萬也若此者不尤偉歟  
然而有司不以表揚朝廷不以入告不得論功於朝卒與閭巷  
之人同湮滅不見況敢希榮寵崇廟祀流聞當時聲施後世哉  
自余所覩聞者則余所見之南境曰佛山百餘年來兩遭變亂  
而亦莫不有豪傑之士共濟艱難者出焉人才之不必取借於  
異代異地亦明矣正統十四年黃蕭養作亂爲嶺南患聚黨數  
萬人樓櫓二千艘攻城掠地僭號稱制張官置吏所過之地屠  
僇殆盡則佛山之父老若梁廣梁懋善霍伯倉梁厚積霍佛兒  
倫逸森梁濬浩洗灝通梁存慶何壽凱洗勝祿梁敬親梁裔堅  
倫逸安譚履禎梁裔誠梁顥梁彝頰洗光何文鑑霍宗禮陳靖  
者二十二人度賊且至首倡大義罄貲財樹木柵濬溝塹儲兵  
械一夕而具蓋若神所助焉賊至則供具酒食以勞敢戰之士  
不避鋒鏑爲有眾先飛鎗連弩以摧其陣車鎔鐵水焚其皮帳  
奇謀迭出斬其僞將彭文俊梁昇李觀奴生擒張嘉績等前後  
斬首二千餘級無亡矢遺鏃之費而黃賊已困矣由前所云無  
甲兵之援險塞之限徒以忠義之所激發能使阡陌耒耜之輩  
奮而爲精兵而大敵破者非此也耶左布政使揭稽上其事於  
朝而當事者歸之真武之神名其鄉曰忠義鄉而二十二人之  
功不與焉此余之所聞者也嘉靖三十年山東淮陰皆大稔嶺  
南尤甚道路死者相枕籍蓋因年穀不登賦役繁多財力訕乏  
人無餘蓄有司限民平糶法非不良也頑悍之民從而挾取之



而剽掠之釁啟矣佛山尤地廣人眾力田者寡游手之民充斥道路欲爲亂者十家而七當是時倡爲亂首者一二人而四境之民一日雲合而響應者四五百人明日則數千人矣初猶以乞濟爲名旋卽恣所欲而取之矣白晝大都之中斬關而奪之金傾覆良善震動官府而亂勢成矣時則主事洗子桂奇奮同室之鬪不避艱險親往諭之誘之以利懼之以禍其人亦皆愧服解其黨而去願受約束是日所保全者蓋數十姓云於是晝爲權約先自出粟煮粥以勸二十四舖之有恆產者亦各煮粥以周其鄰近遣人分護穀船米市以通交易陰械爲首之最桀驁者一人以警冥頑亟訴當路遣官撫諭以安良善乞粟於公府以繼粟之不足始因淫霖傷稼躬禱晴於神以慰民望繼因鐵蟲爲災復爲文以驅之是以一權約立而民罔有背戾者焉

佛山忠義鄉志卷八

祠祀一  
流芳祠

三

拯數百家之危活千百人之命而不尸其功者洗子是也由前所云無得意之位能致之權徒以其忠義之所激發能使咆哮嘯聚之徒化而爲良民而大難平者非此也耶佛山及張槎之父老多洗子之功合詞於行部欲與二十二人者並入祀典祀之洗子聞而力止之此余之所睹者也謹按國朝議功之典以甯濟一時與摧鋒萬里者同賞然則二十二人者能捍外變摧鋒於萬里洗子能靖內亂甯濟於一時其勞佚久速有不同而同於共濟艱難者也要皆在所議者顧非其時與地則人以是爲適然矣漢鄒陽有言明月之珠夜光之璧以暗投人於道眾莫不按劍相盼者無因而至前也蟠木根柢輪囷離奇而爲萬乘器者以左右爲之先容也天下之事大率類此余獨悲二十二人者布衣起窮巷建大勳勞將必有雋異之行爲眾所推服



者而當時之人皆淳樸不以文字顯於世故其行不錄洗子甫登第授職輒謀歸養屏跡城市開徑方山古今載籍靡所不究又多著述跡晦而道愈明身隱而名彌顯足以取信於鄉人舊矣夫以介然一身坐銷大變於萬姓危疑之日謂不有所本哉余暇日爲此論入吾之家乘將以告吾子若孫知鄰境有此變亂而亦莫不有豪傑之士共濟艱難者出焉忠義鄉之名於是爲不誣云無何廣西大參元生陳子至自錢塘丹陽令石臺岑子至自京師聞余有是論也率諸士庶造雲帽之廬謂余曰吾鄉有忠義之士焉功成而弗居名立而不傳猶幸吾子之持正論也或可藉以不泯願吾子之言吾將圖爲錦藏之祖堂歲時祭祀賽會必張之以明示我後之人其於風化似非小補且洗瀨通者洗主事君之高大父也世以忠義相濟其庸可無述乎

佛山忠義鄉志卷八

祠祀一  
流芳祠

三

哉余故併論著題曰世濟忠義記以歸之

明刑部郎中邑人盧夢陽撰

湖廣按察司副使邑人陳紹儒書丹

河南按察司僉事邑人李紹龍篆額

嘉靖三十年癸丑八月立 陳志

按此碑樹靈應祠西廡穹窿斑駁厥製甚古所記屬忠義官及其後人事故附本祠後

忠義流芳祠記

南海粵東首邑佛山南海巨鎮攷之誌佛山舊名季華鄉勅賜忠義鄉豈非鄉以人重哉明景泰中海寇黃蕭養作亂假設名號迫脇齊民兇焰將及季華鄉之壯士梁南園等二十二人誓不從賊謀同捍禦禱於北帝神祠祈默爲相佑神報以吉於是二十二人各出其貲財以供兵食備器械率鄉之子弟合力巡守環村樹柵一夕而就柵上時有羣鳥飛翔若旌旗隊伍之狀賊望見驚怪時值中秋朗月皎潔外嚴守備內令兒童鼓樂游戲以示服豫賊果駭愕不敢犯而去及寇平藩司揭公上其事於朝遂敕賜神祠爲靈應祠春秋遣官致祭復嘉子二十二人



忠義授以冠帶職銜辭不受賜其鄉爲忠義鄉以旌表之後二  
十二人歿立祠於靈應祠側名忠義祠子孫世奉祀無缺然  
祠雖建而素無祀田每當祭日其子孫斂財以供辦此亦向來  
之缺典也予攝篆茲土思與邑中興廢墜適祠之後人梁廣  
菴等呈稱追念舊勳乞酌有餘以補不足請於其先人捐入靈  
應祠之田土名排後實今成舖屋者量撥一間以爲祭業余卽  
行屬官集鄉之紳衿里老詳議具報詳稱眾皆欣躍遂允其請  
將排後實東首舖屋一間與祠中永遠辦祭嗚呼當海寇之猖  
狂也攻城略地鋒不可當倉卒順從以求延旦夕之命者所在  
多有而佛山一鄉地平魚齒非有城堡之固甲兵之強此二十  
二君一旦奮其忠義遂能捍禦強寇不汗茲土又功成謙退辭  
還褒典易曰勞而不伐有功而不德豈非古君子之高義哉予  
船舟河下恭謁北帝神祠因仰二十二君之風規記其始末勒  
石藏諸祠壁俾後之覽者感發興起焉教授文林郎署理南海  
縣事候補知縣蔣迪撰

雍正七年歲次己酉四月二十六日立

乾隆二十四年己卯重修南川王棠撰記

光緒二十年甲午重修祠孫先寶植撰記

兩碑均豎祠內文不備錄

流芳祠題詞

一代朋忠在千秋大義存連營聲勢壯合祀姓名尊漫擬雲臺  
寵空留草野魂卽今修俎豆功賞未堪論陳志

佛山忠義鄉志卷八

祠祀一 二

成功神明之助也故封其祠曰靈應祠封其鄉曰忠義鄉而二十  
二人亦特封爲忠義官後之人在靈應祠右建祠以祀捍災禦患  
民不能忘蓋數百年於茲矣本屆修志正擬搜尋遺軼雅意表彰  
因抄得簡氏朝亮讀書堂集二十四老考一篇謂原題佛山義士  
止有二十人其四人爲番禺曹證李福全李善祥簡彥文等合爲  
二十四人故有二十四老之稱謂吳志竄異原題不得爲信史觀  
縷三千餘言爬剔字句或鉤或距無隙不入於諸義士序次參錯  
名字異同及形聲音義之輾轉沿訛曲證旁通尤爲詳盡皆無關  
要義至以曹證等不入祀流芳祠謂忠義同而異之且忘之不審  
事實而坐忠義鄉以不義之名此之不可不辨按揭布政原題載  
在道光庚寅縣志簡氏所據以駁吳志者也縣志原題二十人有  
梁善奴梁斌奴兩名無梁廣梁懋善梁裔堅梁顥四名今鄉志無



善奴斌奴有梁廣以下四名合爲二十二人此簡氏所以有一人兩稱之疑也今考吳志本康熙二十四年靈應祠志祠志又本天啟三年神座正中碑刻位次其時距正統己巳一百七十二年距建祠年代較近祀典如新必無錯誤斷不能以後數百年之志書頓更成憲此不能執以駁吳志者也而簡氏之意亦重不在此以原題佛山義士定爲二十人則此四人屬之曹簡二李以符其二十四老之說二十四老說本無稽簡氏定爲口碑未足深辨不知曹證等在番禺原籍立功另爲一案原題彙案請敘文義甚明簡氏將曹證等併入佛山諸義士中一似二十二老因人成事曹證等不得入祀幾同烏盡司藏豈可爲訓則且就簡氏所議依據原題條舉而論列之原題除人民倫逸安等六十二字皆人名及曹證等下一併字餘皆隻字不易縣志鄉志祠志並同按縣志載布政使揭原題略云正統十

佛山忠義鄉志卷八

祠祀一流芳祠 三五

四年反賊黃蕭養攻圍廣東城池彼時惟南海佛山人民倫逸安等日月人首倡大義率領當地八邑人民出備財力立木柵開溝塹利器械以爲防備之計後賊果至於是殺其僞官賊首彭文俊梁昇李觀奴生擒張嘉績等賊黨憤怒聚船一千七百艘四面攻圍勢甚猖獗每遇敵時各人供給民夫酒食用大飛鎗摧破其車又鎔鐵水澆焚皮帳計謀迭出不能具述招撫各處難民動以萬計招徠撫恤卒以保全各志同鋪敘戰功至今猶有生氣接敘神靈顯佑有前後殺賊五千餘級一語補敘周密可謂獎飾備至繼敘曹證事云及有番禺人曹證任廣西田州府經歷丁憂回家守制因見賊起與民人李福全李善祥簡彥文亦倡大義立三大鎮保障居民一十三村人口萬計賊來輒殺敗之共六十四字各志亦同其敘事較佛山從略而地段屬之番禺則指數如繪曰番禺其本籍也曰



同家守制同本籍也曰與民人李福全等民人者番禺之人民也  
曰保障十三村番禺之十三村也曰設立三大鎮十三村內之鎮  
也與南海縣之佛山堡渺不相涉也明矣簡氏以番禺志曹證本  
傳有丁憂家居寓南海之佛山兩語遂竄入佛山諸義士中不問  
方域之所在斷章取節失之偏矣且曹證寓佛山李福全等不寓  
佛山也曰居民番禺之民也居之云者地著之謂也其非佛山人  
也又明矣所謂寓佛山者曹證別傳原題無之也佛山當禦賊時  
境內畫分二十四鋪安得復有村名乾隆前縣志謂佛山分十五  
村陳志駁之本可毋庸追論簡氏即因緣此文爲十三村之左證  
果如其說曹證等以僑寓之人管領十三村倫逸安等合當地八  
邑人民僅保二村有是理乎又謂不分主客惟其能者而率領焉  
曹證能矣倫逸安等豈皆無能乎則何不取原題而覆按之也簡

氏借陳志爲由改鋪爲村迹近舞文而所謂立三大鎮者立於何  
地三鎮何名佛山旣爲一大鎮豈此外尙有兩大鎮乎亦不之及  
遁辭知其所窮矣又以原題稱曹證等二十二人與所謂二十四  
老者不符則又曰原文當作二十四人夫旣以吳志竄異原題爲  
不合又作逆億之辭曰某當作某執戈陷盾又何說之辭與指某  
人卽某名將毋同按番禺志曹證傳下註據南海志四字今所存  
爲道光志並無曹傳不知所據何志粵中記載黃賊蕭養倡亂起  
太艮山卽今之大良由大良至佛山所經韋涌勒竹等處皆番禺  
縣界當時賊勢披猖所至擾害必不止一鄉聞佛山仗義興師豈  
無同仇敵愾與佛山響應者曹證寄寓佛山繫懷桑梓歸而團集  
義勇與佛山互結聲援乃在籍士紳應爲之事原奏所以有亦倡  
大義之褒也凡此亦祇就簡氏所據以立論者言之其實原題具



在有無須反覆辨論者原題敘倫逸安之功曰首倡大義敘曹證之功曰及有曰亦倡大義及者連類而及之詞亦之云者有其首者在也事分兩起人分兩地故文亦分爲兩段末總敘戰功曰與倫逸安等又俱各自備船隻率領民壯隨同大軍殺賊咸有勞績其南兩路夾擊黃蕭養遂平各之云者各率一路之謂又合中之分也前半分敘所以清眉目後半總束所以申題請黃賊初起沿邊各都有投賊受僞職者惟南海之佛山及番禺曹證起義事平自應論功行賞揭係廣東布政司例得彙案題奏與邑令專爲一邑申請者不同其申請之詞曰請將曹證等二十二入量予陞賞曹證官也故曰陞倫逸安等民也故曰賞非謂曹證可以統倫逸安也原文明白如此可以不必置喙矣夫以曹證等仗義討賊與

佛山相應英風偉烈令人起敬必曲爲附會以求合祀於流芳祠在曹證亦豈肯享此非分之祀崇德報功責在後人二十二老之祀於佛山曹證四人之祀於番禺亦各行其是而已矣簡氏以曹證等不入祀流芳祠謂忠義同而異之且忘之旣與事實相違卽不得爲公論其所擬祀位欲以梁廣曹證同位於中宮之左右餘亦以主而次客下焉數百年世守之祀無故推翻此事勢之必不可行者況其爲臆說乎夏父弗忌之見春秋弗許也古者家廟神主皆設石函藏廟室之西壁故曰宗祏用石防火也主之制弗載於經伊川程氏著神主式說圓首方跌陷中合面穿中央達四方今工肆所製卽其遺式公祀用祠版有合面無陷中俗稱牌位是也主之有陷中所以書履歷合面書官階姓名藏主用韜櫝無石函與古異祠內祀位前用祠版總題敕封忠義官備書二十二老



姓名分兩級以中左右爲次卽合面也牌後石碑備書名號里居自左而右以先後爲次卽陷中所書也二十二老同室故同一祠版同一石碑用石者防火且防弊也吾鄉宗祠多用此制鄉仕取祠同古法而變通之亦弗鑿於禮意碑首大書天啟三年重建蓋此碑祀位定於建祠之時故曰重重者襲也後之人豈敢意爲增減益歎前人之計深慮遠其創制爲不可易也按祠建於正德八年癸酉至天啟三年重修相距九十四年又嘉靖二十年盧夢陽世濟忠義記二十二老名序與祠碑同嘉靖進士洗桂奇撰洗瀨通傳又與盧記同嘉靖距正德癸酉不過八年是祀位爲建祠時所定已無疑義霍孝廉偉南著有駁議茲篇亦多採其義總之二十二老名字位次卽有异文亦與番禺曹證四人無涉簡氏此考得無詞費乎簡氏以著述名海內其指摘吳志不失爲責備賢者但非吾鄉國故不得不詳加討論免惑後人章實齋作文史通義不稍屈於戴東原所爭者大也至曹證寄居佛山應屬佛山忠義鄉志卷八

祠祀一  
烈士祠 三五

流寓及在原籍立功與梁廣等异地同符故收入忠義傳以光潛德且志例也取舍之間惟求其是而已

霍烈士社

廟在柵下鋪青龍義榕兩社之間故稱社故址已湮今奉祀於靈應祠左大魁堂烈士名仲孺事具忠義本傳

按霍烈士先登陷陣中礮而亡爲諸義士特出人物當是時與賊相持數月雖獲全勝亦斷無不傷一人不死一士之理乃未蒙卹典誠爲憾事陳志所以慨乎言之也語在本傳至疑爲諱敗則必無之事諸義士撲茂淳冲不習例案庸或有之掩飾則非也且烏知非已經申報題奏漏未聲敘乎今烈士既有專祀馨香俎豆謳頌不衰足以不朽矣二

二老祀靈應祠右霍烈士祀靈應祠左位置甚合

又按大清會典羅舉羣祀其生平事蹟合於祭法者均得奏請建祠吾鄉忠義官捍災禦患在有功則祀之例霍烈



士以死勤事祭於里社與廟祀無異故附次流芳祠列入官祀以近代報恩義勇義烈諸祠附焉

報恩祠 在山紫舖田心書院之左 咸豐七年建

中祀

贈內閣學士銜陞授貴州布政使留任廣東按察使沈棣輝

中左祀

贈朝議大夫六品銜廣東補用知縣前署佛山同知謝效莊

中右祀

廣東補用知縣署海豐縣知縣前署五斗口司巡檢張金鑑

按祠建於咸豐七年是時三公皆已去任故書贈書前紫

陽綱目賢良既卒必具官爵義本春秋三公功在佛山謹

照詞版備載職銜用昭崇報謝分府張五斗傳在職官志

佛山忠義鄉志卷八

祠祀一 五 報恩祠

忠勇祠 在報恩祠右 咸豐七年建 祀咸豐四年陣亡勇弁

中祀勇弁十名

周華以 梁瓊新 蔡國成 蔡植亨 羅好遠

何國顯 梁松邦 何成廣 何平輪 鍾成珍

旁祀陣亡勇丁一千餘名册報在官牌位剝落不能備錄

按紅匪之亂蔓延各府是時沈棣輝為督糧道主兵柄謝

效莊張金鑑悉隸麾下故鎮人為之建祠以謝張二公配

大清會典凡帶兵大員戰績卓著得在立功地方奏請建

祠若為國捐軀其陣亡弁兵亦得按名附祀卹典尤隆甲

寅之役陳開雖遁西北兩路餘匪不次蠢動抗拒官兵前

後陣亡一千餘名南順勇居多以死勤事益動鼓鼙之感

惜士民未及稟陳大吏不以入告不無缺憾而馨香俎豆



血食千秋可以不朽矣兩祠卽田心書院之前夾室不能合爲一祠而忠勇祠在下方於祔祀體制亦合

義烈祠

在祖廟舖涌邊咸豐十二年都司黃曜吉捐建

奉祀

敕授武略騎尉義烈黃公福喜

敕授武德騎尉義烈黃公 劍 諸公之神位

敕授武略騎尉義烈劉公應開

祔祀陣亡勇丁黃閩全閩璋等八百餘名

按黃曜吉東莞厚街人所將皆子弟兵咸豐初赴北江剿賊凱旋會紅巾賊起道梗不能歸入保三水縣城解圍後赴佛山本任六年英夷入廣州遊弋至佛曜吉率所部禦之斬其酋於長船尾我兵亦有死傷自剿賊以來前後陣

佛山忠義鄉志卷八

祠祀一 忠烈祠 三十

亡弁勇八百餘名及是自行捐廉建祠以祀雖未經奏請而典禮既合例得列入官祀援故事私諡義烈鎮人至今思之



佛山忠義鄉志卷八

祠祀二

尊孔會 圖載卷首

尊孔會 在祖廟舖古洛社涌邊尊孔會公建中爲堂寢供奉孔子像故列入祠祀兩壁嵌虞世南孔子廟堂記李石泉 可瓊都轉家藏石刻由其後人送出其地依山面水頗占形勝前引洛水匯爲池沼環植竹木左爲辦事所右爲招待室迤北有樓翼然其南建亭岡頂與樓相望層巒聳翠磴道紆迴近市不囂在野不僿蓋公園式也遇誕祭來雖止肅維翼維嚴時以春秋佳日雅集其中油然有風浴詠歸之樂緇帷之下杏壇之上皆可想像得之作聖域觀矣因摹照廟堂記敬錄如左以題詞碑記附

按東華錄載康熙二十三年上幸曲阜聖廟行禮畢詣聖

佛山忠義鄉志卷八

祠祀二  
一  
尊孔會

蹟殿周覽圖書及憑几像行教小影立像行像諸石刻顧問衍聖公孔毓圻何像最真孔毓圻奏曰惟行教小影顏子從行者爲最真乃當年端木賜傳寫晉顧凱之重摹者廟中石刻立像卽孔廟搨本乾隆中戴太常奏請添孔子誕祭得旨着無庸議蓋祭不欲數丁祭隆重若開誕祭適形其褻大哉王言非小儒所能仰測惟官祀用丁祭民祀則應用誕祭禮時爲大此之謂也又李次青天岳山館文鈔書院祀孔議略謂書院建廟不惟財力不逮亦非民間所敢僭厥制宜如香火龕歲時釋菜取足行禮而止其言甚辨湘省書院行之我國學堂俱祀孔子吾鄉尤盛得此作模範彼都人士以時展祀莫不尊親太史公曰高山仰止景行行止聖教昌明於是乎在已



孔子廟堂之碑

謹照原碑校正

太子中舍人行著作郎臣虞世南奉

勅撰并書

司徒并州牧太子左千口率兼檢校安北大都護相王旦書  
碑額

微臣屬書東觀預聞前史若乃知幾其神惟睿作聖玄妙之境希  
夷不測然則三五迭興典墳斯著神口聖跡可得言焉自肇立書  
契初分爻象委裘垂拱之風革夏翦商口口口口質文殊致進讓  
罕同靡不拜洛觀河膺符受命名居域中之大手握天下之圖象  
雷電以立威刑法陽春而流惠澤然後化漸八方令行四海未有  
偃息鄉黨栖遲洙泗不預帝王之錄遠跡骨史之傳而德侔覆載  
明兼日月道藝微而復顯禮樂施而更張窮理盡性光前絕後垂  
範百王遺風於萬代猗歟偉歟若斯之盛者 夫子膺口口之精

佛山忠義鄉志卷八

祠祀二

二

尊孔會

踵千年之聖固天縱以挺質稟生德而降靈載誕空棄自標河海  
之狀纔勝縫掖克秀堯禹之姿知微知章可久可大爲而不宰合  
天道於無言感而遂通顯至仁於藏用祖述先聖憲章往哲夫其  
道也固以孕育陶均苞含造化豈直席卷八代并吞九丘而已哉  
雖亞聖鄰幾之智仰之而弥遠亡吳霸越之辯談之而不及于時  
天應浸微地維將絕周室天壞魯道日衰永歎時艱實思濡口遂  
廼降跡中都俯臨司寇道超三代止乎季孟之間羞論五伯終從  
大夫之後固知栖遑弗已志在於求仁危遜從時義存於拯溺方  
且重反淳風一匡末運是以載贄以適諸侯懷口而遊列國玄覽  
不極應物如響辯飛龜於石函驗集隼於金檣觸舟既曉專車能  
對識凶象之在川明商羊之興雨知來歲往一以貫之但否泰有  
期達人所以知命口舒唯道明哲所以周身隔里幽憂方顯姬文



之德夏臺羈紲弗累商王之武陳蔡爲幸斯之謂歟口是自衛反  
魯刪書定樂贊易道以測精微修春秋以正褒貶故紫微降光丹  
書表瑞濟濟焉洋洋焉充宇宙而洽幽明動風雲而潤江海斯皆  
紀乎竹素懸諸日月而仁獸非時鳴鳥弗至哲人云逝峻嶽已隕  
尚使泗水却流波瀾不息魯堂餘響絲竹猶傳非夫體道窮神至  
靈知化其孰能與於此乎自時厥後遺芳無絕法被區中道濟天  
下及金冊斯誤玉弩載驚孔教已焚秦宗亦墜口流口口之口口  
始永言前烈喪成爰建用光祀典魏之黃初式遵故訓宗聖疏爵  
允緝舊章金行水惠亦存斯義而晦明匪一屯亨遞有篚筥蘋蘩  
與時升降靈宇虛廟隨道廢興炎精失御蜂飛蝟起羽檄交馳經  
籍道息屋壁無藏書之所階基絕函丈之容五禮六樂翦焉煨燼  
重弘至教允屬聖期 大唐運膺九五基超七百蒸矣王猷蒸哉

佛山忠義鄉志卷八

祠祀二 三  
尊孔會

景命鴻名盛烈無得稱焉 皇帝欽明睿括察天兩地迺聖迺神  
允文允武經綸云始時惟龍戰爰整戎衣用扶口口神謀不測妙  
筭無遺弘濟艱難平壹區宇納蒼生於仁壽致君道於堯舜職兼  
三相位揔六戎玄珪乘石之尊朱戶渠門之錫禮優往代事踰恆  
典於是在三睠命兆口口口克隆帝道丕承鴻業明玉鏡以式九  
圍席蘿圖而御六辯夤奉上立肅恭清廟宵衣旰食視膳之禮無  
方一日萬機問安之誠弥篤孝治要道於斯爲大故能使地平天  
成風淳俗厚日月所照無思不服憬彼獯戎爲患自古周道再興  
僅得中筭漢圖方遠纔聞下冊徒勤六月之戰侵軼無慝空書貳  
師之兵憑凌滋甚皇威所被犁口口口空山盡漠歸命闕庭充仞  
葉街填委外廡開闢已來未之有也靈臺偃伯玉關虛候江海無  
波雋燧息警非煙浮漢榮光莫河楛矢東歸白環西入猶且兢懷



馭朽睠納口隍卑宮菲食輕徭薄賦斷堦反樸抵辟藏金革烏垂  
風綈衣表化塵選列辟旁求遂古克己思治曾何等級於是眇屬  
聖謬凝心大道以爲括羽成器必在膠雍道德潤身皆資學校矧  
迺入神妙義析理微言厲以四科明其七教懿德高風垂袞斯遠  
而棟宇弗脩宗祀莫嗣用紆聽覽爰發絲綸武德九年十二月廿  
九日口口口口隨聖侯孔嗣拓子德倫爲褒聖侯乃命經營惟新  
舊陟萬雉斯建百堵皆興揆日占星式規大壯鳳蕙騫其特起龍  
栢儼以臨空霞入綺寮日暉丹檻宵宵崇邃悠悠寫狀妙絕人口  
口設已陳肅焉如在握文履度復見儀形鳳跄龍蹲猶臨咫尺魄  
尔微嘆若聽武城之絃怡然動色似聳簫韶之響襜褕盛服既覩  
仲由侃侃禮宗口口口口不疾而速神其何遠至於仲春令序時  
和景澍皎絜驛池圓流若鏡青葱槐市摠翠成帷清滌玄酒致敬

佛山忠義鄉志卷八

祠祀二 四  
尊孔會

於茲日合舞釋菜無絕於終古 皇上以幾覽餘暇遍該群籍乃  
製金鏡述一篇永垂鑒戒極聖人之用心弘大訓之微旨妙道天  
文煥乎畢脩副君膺上嗣之尊體元良之德降情儒術遊心經藝  
楚詩盛於六義沛易明於九師多士服膺名儒接武四海之內靡  
然成俗懷經鼓篋攝齋趨巽並鏡雲披俱登泉涌素絲旣染白玉  
已彫資覆匱以成山導涓流而爲海大矣哉然後知達學之爲貴  
而弘道之由人也國子祭酒楊師道等偃玄風於聖世聞至道於  
先師仰彼高山顛宜盛德昔者楚國先賢尙傳風範荊州文學猶  
鐫哥頌況帝京赤縣之中天街之側口口口觀用崇明祀宣文教  
於六學闡 皇風於千載安可不贊述徽猷被之雕篆乃抗表陳  
奏請勒貞碑爰命庸虛式揚茂實敢陳舞詠迺作銘云 景緯垂  
象川嶽成形挺生聖德實稟英靈神凝氣秀月角珠庭探曠索隱



窮幾洞冥作述爰脩丘墳咸紀表正十倫章明四始繫續義易書  
因魯史懿此素王邈焉高軌當塗創業亦崇師敬胙土錫圭禮容  
斯盛□□兵利龍文鼎輕天垂伏鷲海躍長鯨解蔽去佩書燼儒  
坑纂堯中葉追尊大聖乃建褒成膺茲顯命□□□□三戈載揚  
露霑闕里麥秀邳鄉修文繼絕期之會□禮亡學廢風頽雅缺戎  
夏支馳星分地裂蘋藻莫奠山河已絕隨風不競龜玉淪亡樽俎  
弗習干□□□□□合德人神攸贊麟鳳為寶光華在旦繼聖崇  
儒□□□道赫赫玄功茫茫天造奄有神器光臨大寶比蹤連陸  
追風炎昊於鏢 元后膺圖撥亂天地□□□肅升堂兢兢讓席  
獵纓訪道橫經請益帝德儒□□□紆紫重纓霧宿洞戶風清雲  
開春牖日隱南榮鏗眩鐘律蠲絜盥明容範既脩德音無鞅肅□  
□□□□□□□□

佛山忠義鄉志卷八

祠祀二 五 尊孔會

創建佛山尊孔會堂

霍偉南

佛山草萊未闢古刹經堂先肇迹地雖祖佛人宗儒不重方  
袍重縫掖憶昔汾陽賊寇邊八圖諸老精忠激一聲銅鼓振靈  
祠魘魅狂奔戈倒擊正氣由茲社學崇嘉禾復愛田心植鳳形  
威耀藻翔高藹吉思皇多士式自從滄海橫流決歐風漸被東  
西逼春秋大義日星沈虎觀經壇黯無色黃生伯讎奮袂起峻  
立道開距楊墨誓倡尊孔任仔肩思以一隅障川百裏纒萬里  
將伯呼窮歷東瀛與燕北歸來揆日方中定古洛荒邱菑鬻鬻別  
轉盼堂成俎豆陳四方觀禮途為塞不須更草新宮銘壁上古  
碑妙摹刻食德故家風尚存莘莘子弟咸儀抑禳星舊俗開塵  
肆旌旆盡變飛黃赤我來瞻拜望城頭忠義軌循門斯得旂帶  
涓流辨濁清滄浪孺子歌猶識滔滔天下易將誰太息當年問  
沮溺同是傷心望魯人高岡豈為聽鶯陟五百年間明王興極  
我蒸民登祚席且與詠歸沂水濱不教墓哭泰山側吁嗟斯堂  
萬古垂不朽有三太上德雖云開始冠大雄終遜大成伸巧力  
尊孔會公落成記

宣統元年己酉十月鄙人自大連回里發起尊孔會一時同志  
之士雲集響應報名入會者數百人爰週刊發捐冊徵集助金  
招雨田君慨捐五百元首為之倡鄙人亦竭其棉力勉捐百金  
以踵其後速至二年庚戌二月約計捐款得四千金會內同人  
咸議購地先定基礎鄙人因相地之故犇走道途日無暇晷卒  
擇得古洛社之桑岡是地也右鄰古廣前繞清溪茶隴桑畦青  
蔥可愛遙望石灣諸山宛如一幅畫圖豁人心目乃邀同人羣  
至斯地憑眺久之皆交口而稱曰此地最宜於公園遂決議購



之或者不察妄流蜚語謂是地為鄙人產業荒蕪不治特創此會希冀成立售而去之不知購券俱在班班可攷烏能盡誣於鄙人公益之難於措手有如此者得不令後起者灰心乎雖然得將伯之助踴躍募捐壘土成基匯流為海窮一年之力集款至一萬金由是開闢道路修治公園鳩工庀材築會堂於園中建兩亭於岡上其經始也二年十二月其落成也三年七月若夫購地之資建築之費具載徵信錄留心時務之君子可以按圖而索驥也不復贅於斯文宣統三年辛亥七月吉日黃棟華撰會員楊占彪孔廣策任文機潘泰年羅森權仝立

羣廟

盤古廟一在明照舖大塘尾街 一在富文舖盤古街乾隆戊子重修

盤古廟任昉述異記南海有盤古墳互三百里俗云後人葬盤古皇也佛山屬南海轄境就地建廟不為無因 節增舊志

按祠祀故事舊志收入雜錄今散附各廟後與碑記同

重修盤古廟碑

渾渾混混榛榛狂狂立黃初判之年蒼莽無垠之會神靈首出戴五嶽于一身草昧未開莫九垓於兩手稽其世次固超帝而邁皇生於大荒倘父天而母地當日月星辰風雲雷雨之肇造佛山忠義鄉志卷八 祠祀二 六

尊孔會

莫為之前光攝提合維連通敘命以稱尊不知其紀夏哉尚矣惟盤古乎且夫天始生人生一二人耶生億萬人耶生一二人則盤古者直兩間之宗子生億萬人則盤古者實三才之首君世代遙遙誰聞誰見簡編歷歷傳信傳疑此固周史官所不及詳抑亦秦博士所莫能悉矣我佛山之有盤古廟也問締構以何時已失大撓甲子喜鼎新而拓地曾當嘉慶庚申棟宇巍峩香火絡繹街則擁六丁年最富鶯花墟恰齊三亥日頗繁鰓菜茶棚酒肆供遊賞之流連舞榭歌臺盛禱禳之報賽是雖鄉邦習尚良由神廟英靈已何期青犢呈妖蒼鵝肇變生肘腋禍起蕭牆石雲之山遽橫鐵鎖汾江一水徧樹紅旗篝火狐鳴近二日城災魚及幾三萬家遂使鴛瓦灰飛虹梁煙至重榮復所由來而王戌重修之不容已者也今則堂廊式廓庠廡增華美甚芝栢番哉藻井揚子雲之所賦璇題玉英班孟堅之所陳軼稜金爵赤輝青瑣雖非野處之風網戶楯軒已易巢居之舊聽迎神送神而有曲鐘鼓常聞冀福我祿我而降祥豆籩時薦協辦大學士四川總督駱秉章撰禮部儀制司員外郎軍機處行走梁僧寶書并篆額 此廟與先鋒廟靈應社毗連同時重修以同治元年十月竣工二年九月頭門遭同祿至四年二月再修頭門并識于此 藥皇廟舖在社亭舖朱紫市道光甲申年重修祀神農 一在醫靈舖上池里名神農聖廟 按舊志羣廟以舖為次有一廟分見數舖者頗失之繁今



照邑志例以廟為綱以在某舖某街某年建修為目分注

是廟之下又各廟建修年代碑記不齊應以現在為斷

字祖廟

一在豐寧舖驚岡名敬字亭有記 一在錦瀾舖石路

敬字亭碑記

字紙社之結屢矣皆不久而廢何歟無實業以贍工人無定址以藉其勤惰有名無實宜其興而復廢也顧自斯社廢字紙之工食亭以居工人貯字紙時焚化今而後僱工有資勤惰可省者食其食而愈其專則斯舉庶幾其可久也爰將發題姓名及買置屋舖修改各費備刻諸石

一本亭一座三間正間闊廿一坑左右兩偏間各闊十三坑另左邊廚房一所闊十一坑深淺與本亭相齊右邊廚房一所闊十九坑深一丈亭前正中為字紙爐左右兩廊各闊十三坑本亭前至照牆外滴水後至后簷外滴水為界另舖一間在新安街北向深三進闊十五坑乾隆五十五年用價銀五十九兩當官承買蒙南海縣憲嚴恩准給照調署南海縣正堂嚴為遵批再繳等事現據五斗口司詳解舉人勞潼等添繳承買佛山驚岡茶庵舖價銀六兩八錢詳請給照等由到縣當批解到銀兩兌收貯庫候給照勞潼等管業此繳在案查本家巷舖先經徐前縣訪獲余天相等在該巷聚眾

佛山忠義鄉志卷八

祠祀二 羣廟 七

燒香業經訊詳奉行將該菴屋示召變賣批解充公續據該司批解勞潼等承買該菴舖備銀五十一兩二錢到縣貯庫當經前縣查核價數短少批飭增估去後茲據該巡司補解前來合就給照為此照給舉人勞潼吳廷招區宏緒等收執即便將承買茶菴修建惜字紙亭其新安街舖屋一間修整租賃支給工人口食以垂永久該舖菴稅糧向在佛山堡一百八十八甲羅兆元戶內舉人勞潼等遞年遵照輸將如有別人爭估菴屋許即稟明拿究毋違須照

一修整亭舖二處磚石木料灰瓦工銀暨碑連買屋舖價及

一房東置椅棹各費共銀一百三十七兩八錢七分

一館俾察工人勤惰其人必能留心督率工人者方得租賃其

乾隆五十五年仲秋穀旦里人麥昶敬書值事勞潼吳廷招區宏緒劉東陽李憲邦等全立

重修敬字亭碑記

驚岡敬字亭向祀倉頡先師兼祀文武二帝并魁斗星君從前勞莪野先生與諸同人雅集之所歲久圯道光甲辰余偕諸同志捐簽修復今春樸園吳君冠山唐君暨諸君子又結觴詠社詩酒其間捐資砌岡路蒔梅桐花竹於此間少得佳趣亦足以暢敘幽情韻事韻人後先繼美洵勝場也今鐫碑於亭之陰諸君子問序於余余因弁數言壽諸石

道光二十六年丙午季冬吉日

里人李可瓊拜撰



惜字社學在大基舖關巷同治三年建光緒十八年修

順德惜字社學在岳廟舖錦里同治九年建以上據採訪冊

按兩惜字社學皆安奉字祖歲修祀事僱人檢拾字紙與其他社學有會文課藝者不同故隸祠祀志

太上廟一在汾水舖安寧直街嘉慶己未重修 一在明心舖宣統三年修

汾水太上廟古蹟肇於康熙五十年夏六月居人恆見紫雲下降七月而東北江漲有神像隨波漂來止於樹下居人拾以拭之見其頭髻道裝儼如一老子道君狀方悟紫雲之降實則紫氣東來也爰伐樹建祠祀之初制甚小既而聲靈赫濯禱求如響自是以來地運日益旺民居日益稠統安寧會龍聚龍三社人咸崇奉之號為公廟乾隆二十五年里人黃沃生捐送餘地增其式廓並於廟右附建王母殿香火益盛環廟而居者有廟左廟右街嘉慶己未道光己酉光緒丁丑三度重修而廟貌巍峩遂為舖中廟社之冠據採訪冊

按老子著道德經自成一子孔子與門徒說禮亦多用其

說其功在守待足與中古匹休乃反為世俗香火之所掩

佛山忠義鄉志卷八

祠祀二八 羣廟

可歎也夫而靈異既著祇得循唐宋故事藉挹清高

文昌廟在明心舖名文昌書院里人李象豐有記 一在協天勝里名桂香宮乾隆癸丑年重修 一在欄下海口名文昌閣乾隆七年建佛山同知黃興禮有記道光乙酉重修吳榮光有記

文昌書院記

佛山向無文昌專祠自李大司徒公始公嘗捐百金購學田隙地畝餘以為山川之秀畢萃於此因創文昌書院以供春秋伏臘約費千三百餘兩經始於崇禎壬午秋落成於癸未冬金碧丹堊輝映日月一以培風氣一以作士類甚盛心也自公創為書院文運蒸蔚而起諸士尊之如父師及捐館舍諸士失其典型哭公於書院奉其像位而祀之俾子為記予知公之精爽陞降不越茲地生平靖共正直與神之忠孝頡頏崇祀一堂何愧焉里人李象豐撰據道光庚寅邑志補

海口文昌閣記

乾隆七年九月佛山之文昌閣落成諸紳士相率來謁請余誌之佛山固嶺表一都會也控東西省之上游四方商賈奔走鱗集乃其諸生獨閉戶潛修絃誦自樂不見異物而遷焉宿學之餘類多得雋以去故廣郡科第之盛甲於粵中南海科第之盛甲於廣郡佛山科第之盛又甲於南海地靈人傑或亦其形勝使然歟余竊考佛山圖經地本鳳形鳳為文明之象產是地者宜其有秀出奇偉之材奮王路而登天衢以輔鞮太平諸所建之文昌閣適當鳳翅嘗讀卷阿之詩曰鳳凰于飛翩翩其羽



諸生之升華耀采其不藉此翩翩者歟故詩繼之曰亦集爰止  
藹藹王多吉士惟君子使媚于天子言愛君也又繼之曰亦傳  
于天藹藹王多吉人惟君子命媚于庶人言愛民也諸生束髮  
肄業非徒弋取科第從事於利祿之路而已必上之以愛君下  
之以愛民講求實學為天下國家之用夫羽毛不豐滿者不可  
以高飛鳳凰非竹實不食非梧桐不棲其立志之遠且大也否  
則鷦鷯之巢林不過一枝斥鷃之決起止於榆枋豈余所望夫  
諸生耶嘗恭繹上諭諄命直省重臣頒行經史振興學校詢成  
周卷阿之盛際矣鳳凰鳴矣于彼高周斯諸生乘運而興雖  
嗜嗜之候乎夫文昌星在薇垣天文也聖天子化成人文  
也以文明之曜臨文明之地又逢文明之世余於諸生有厚  
望焉閣自經始至今已七年矣其在丙辰佛山之發解者為談  
君德其在辛酉佛山之發解者為陳君炎宗以三科而出兩元  
人皆詫為盛事然此其乘章爾嗣今以往人才蒸蒸蔚起凡馮  
翼孝德圭璋之聞望日出而為綱為則以光輔我國家四海九  
州羣仰佛山為河閣而以為鳳凰之所萃處焉豈不休哉

佛山同知黃興禮撰  
乾隆十三年歲次戊辰仲秋穀旦 已上陳志

重修佛山海口文昌閣記  
天下之祀文昌以求福眾矣顧神明之舍不辨崇奉之儀不至  
神且弗歆焉乎福吾粵佛山之東南海口有閣以祀文昌建於  
乾隆七年迄今九十餘載譚形勢者曰此文星也宜乎舉甲乙  
科登顯仕者歲不乏人道光乙酉二月余備藩黔南鄉之人郵  
余日閣且日圯眾議釀金三千兩有奇鳩工庀材因地勢所宜  
佛山忠義鄉志卷八 祠祀二 九

而增高之屬記於余余捐廉襄工以復曰萬物相見乎離而齊  
乎巽巽東南也其象為風九卦以風行權居高則令可布也其  
方為巳十二辰以巳為文非高則文不耀也文昌斗戴匡六星  
文者精所聚昌者揚天紀輔拂並居以成天象而貴相理文緒  
司祿賞功進士意者其顯樂昭著萬古如一日乎今仍其方位  
則神明之舍安矣隆其棟宇則崇奉之儀著矣佛山為省垣西  
南重鎮四面環海氣運所鍾商賈輻輳人文奮興於今為盛四  
方之遷者僑者從學而來者宦而歸者權緝竿以起家者執藝  
事以自食其力者咸以風淳俗美鄉有賢者梯航筴笈鱗萃雲  
集皆來而卜居焉今閣之修也文明之氣高羸東南上通斗極  
光焰萬丈蒼茫迴合下澈海水而香煙燈燭復與虹梁蛤戶沙  
碧雲青五色十輝互相映發厥文彌彰其將有躋三台魁多士  
者出乎其間以應聖天子作人之運歟抑又聞之道書以文昌  
帝君一十七世為士大夫在周日張仲詩曰張仲孝友吾願與  
諸君子敦錫類之仁求篤慶之本各親其親各長其長庶幾風  
愈淳俗愈美毋辰神之教以迓庥福於無窮也是為記里人吳  
榮光撰  
道光六年丙戌四月督修里人方鈺等立石

按周禮大宗伯以實柴祀星辰有司中司命司民司祿之  
祀鄭司農云近文昌為司命次司中次司祿次司民是文  
昌為天神四星皆其所屬故其神最尊今人於文昌帝前



旁立注福注祿注壽注嗣四神不爲無本世傳神名張惡  
子梓潼縣人因陰隲文有十七世爲士大夫身句謂卽張  
仲後身則又天神而人鬼之矣然亦有說焉大司樂凡以  
神仕者掌三辰之位以猶鬼神元之居注猶圖也圖其所  
居之位也以人鬼居天神位薛季宣謂非通幽明之故者  
不能於是士大夫沿爲故事書院社學奉祀尤虔大清會  
典文昌列入中祀儀制隆重今官祀雖廢民祀尙存明文  
三橋有陰隲文印譜昭代叢書有曹學詩陰隲文頌皆斑  
斑可考說在金石志士林欽若有自來矣

文武廟

一在明照舖厚俗里祀文帝武帝康熙丙午重修雍正壬  
子續修一在錦瀾舖忠義里雍正壬子重修乾隆丙戌

續修

乾隆甲午年建

關帝廟

一在祖廟舖協天勝里乾隆癸丑年重修道光九年拓寬  
廟前餘地一在東頭舖雍正四年建嘉慶甲戌年重修

佛山忠義鄉志卷八

羣廟

祠祀二十

光緒年續修

一在錦瀾舖忠義里乾隆庚戌年重修一在仙

卯年重修

一在岳廟舖永豐大街乾隆二年重修乾隆三十年

續修

一在汾水舖永興街順治八年建道光庚寅年重修

一在汾水舖

正埠對海舊志寶洲寺一在高度地下巷

重修佛山汾水關聖大帝廟

聖人爲萬古扶世翼教而其威靈所著尤莫盛於顯忠遂良之

代大之則激忠義而捍災患小亦彰善惡而厚風俗余自通籍

後伏讀列聖詔旨敬記關聖大帝護國庇民之大者二事一則

嘉慶十八年平教匪案一則道光八年獲逆苗張格爾案均於

查其不可測度之際特見神威電掃風馳么麼立靖朝廷屢加

封號載入祀典煒矣哉千六百餘載以來大義孤忠炳鑒宇宙

而於我朝崇奉愈隆昭格愈著豈不以太平之世所以激忠義

厚風俗以保此萬年有道者帝心如天之所助者順耶使天

下之人尊朝祀仰神威自大邑通都泊山陬海陲奔走警慄

如鑒如臨承事於塵遺也稽帝致曹操書有曰日在天之上普

照萬方心在人之中以表丹誠及其斥吳人則有神隨天帝縹

緲下鑒人世順逆忠邪若者福否者禍令萬古知有大丈夫湘

道義塞天地仰望者豈但湘江漢水之上之語於戲剛大之氣配

嘉慶十年重修後至今又二十有六年地枕江干沙水所蓄牆

基柱礎漸就傾圯道光庚寅正月里人倡議重修捐輸廣至得

銀一萬一千餘兩添購廟旁梁姓排草街舖地兼葺廟後華光



殿大慈閣經營揀度越八月告成棟宇用壯金碧交輝蠅蝓蟻  
護之中神實憑焉夫佛山自前明里社同心捍賊以忠義名鄉  
生聚日蕃風俗日厚今鄉人又能知作善降祥之理事正神以  
求福無漸矣影各凜且明將見忠義之氣毓為嘉徵貨隱駢羅  
居民康阜以遵道遵路為忠以蒞姻任郵為義庶幾周怨厝  
千百年承帝之休於無斁也是為記里人吳榮光撰  
天后廟一在柵下舖藕欄明崇禎元年建乾隆十五年四十二年  
里乾隆甲寅年重修乾隆一在豐寧舖通勝街一在山紫舖中和  
里雍正壬子年重修乾隆一在觀音堂舖富路坊  
口嘉慶十九年重修乾隆一在福德舖水巷正街  
康熙十七年重修嘉慶丁丑年重修

按傳天妃林氏女閩之莆田人父名愿仕宋為巡檢女生而靈  
異不肯結褵能言禍福卜奇中沒後其鄉人立廟於涓洲之嶼  
歲時崇祀焉嶼在興化之東南海中與琉球國望宋宜和間敕  
封順濟夫人元至正改封靈惠我朝洪武初敕封護國庇民妙  
靈昭應宏仁普濟英烈天妃春秋有祭載在祀典海濱山嶺無  
帝並稱荷嶼藻薦儀牲廟貌崇隆香火鼎盛幾與漢壽亭侯今關  
山忠義鄉柵下里古有天妃宮以增形勝歲時遐邇虔禱車擊  
肩摩應若桴鼓其所從來匪朝伊夕然地勢湫隘祠宇歲遠漸  
湮會今上改元之始歲為戊辰乾坤煥然恩淪中外而余兄好  
問方解幕政休沐里中遂與諸鐵商陳振祥周文煒等議為鼎  
佛山中忠義鄉志卷八 祠祀二 士

新之計驟金五百有奇庀材鳩工擴其地易其制而大創之工  
始於四月初九日辰時落成於九月十三日入火地縱七丈衡  
三十一尺前有門有神像俎豆其間後建公館堂寢為鄉人及  
眾商謙集之所巍煥一新壯宇內巨觀不獨雄視鄉國而已余  
兄以諸商意緘書濬署授余記其事同望家園神爽如在誼何  
敢辭考祀典禦大災捍大患有大功於民者俱得血食於斯土  
遡稽路允迪張源陳嘉猷彭必盛林霄姚隆前後諸公獲福於  
於耕鑿歌詠其微惠豈淺鮮哉今日海不揚波普天同治上而  
后王君公下而農販嬰孺無不知崇奉者其於祀典又何有焉  
是宜世世享廟而余且樂為操筆以紀於貞珉是為記  
崇禎元年戊辰 月里人李待問撰

陳恭尹

仲尼盛稱鬼神之神而後世拘儒乃或以其近於語怪不復深  
論從而為之說曰鬼歸也神伸也竊意以為未盡夫天地塊然  
大物耳所以輔相裁成其間者鬼神也然而不都邑政令所及有  
人道為之紀綱則鬼神不必赫然昭著唯不平而後見焉至於  
江海波濤之紀綱則鬼神不必赫然昭著唯不平而後見焉至於  
如吏持法比比然也昔人有言曰至治之必谷如響應聲犯之必校  
也賞罰公明陽施陰伏疫癘不作無所用其神也江湖空曠陰  
氣所凝怪風異類發作無時非有鬼神為之護持則人之罹於  
不測者眾矣吾鄉濱海所虞事之神則英烈天妃為最相傳為  
莆田林氏處女今閩人謂之天后者也人之往來海上者每當



風濤大作則竭誠拜禱眾口同聲仰頌英烈天妃名號頃之必  
有神火從空中飛來集於橋上異香飄然入於舟中則其舟自  
定雖浪如山岳若履坦途否則安危未可知也故神之名號莫  
不求奉而戶祭之甚於事其父母而廟貌之建在在有之佛山  
為商客所歸其殿宇尤為壯麗每三月神誕香花火暴之盛旌  
旗環海者目觀靈贖謂非紀之以文章不足以頌神功之大也  
相屬而問序於僕夫神之初處女也而妃之后之則匹偶之稱  
也顧出於前代之深思之而得其說矣河洛之數天一而可以  
偶之義加之平吾深思之而得其說矣河洛之數天一而可以  
六成之盈天地之間無非水也天居外居內水貫乎內外之  
間者也大乎天體動地體靜水則涵可動靜之用者也故曰神  
物莫大乎天莫大乎地亦莫大乎水地配天故尊之曰妃妃配  
司乎水者也水德配天地之功亦配天地故尊之曰妃妃配也  
曰至聖之德配天云爾尊之至也他何足以頌之故引伸其說  
而為之記

柵下天后廟碑三 此碑多古字今譯為真書附本廟後原

天后以神女顯蹟海邦捍患禦災無遠弗屆法食祝號李士為  
一矧為吾粵事鬼最篤亦惟佛山實西北江之衝歲有濫汨憂  
陸而稼水而楫危安吸呼人事窮矣非神其奚依茲廟肇興明  
莊烈朝聖清臨元乾嘉再修塵里祈請應時有驗從今以來應  
不加飾者餘十載棟榱庭菲靈像蔽翳明神弗蠲達識重馬歲  
二月初吉有事於廟自命家以訖齋毗咸盱顧方皇一口言曰  
佛山忠義鄉志卷八 祠祀二 三

羣廟 祠祀二 三

失今不治後其有悔粵若來三月謹擇餘愿斂材屬役退邇響  
效輸輦踵接斷磯甸埧具中程準八月既望工告畢功門除亢  
爽宮廡揭葦萬日諦料若喪前址乃卜良日創珥祐神肅奉還  
御成禮以退既退則相與請辭於致仕鴻臚寺少卿梁僧寶字  
穎倩而乞在告翰林院侍讀學士李文田字仲約書而鐫諸石  
在十有一月龍集丙子皇帝即作之二年其辭曰  
嗟嗟神后均德八方胡勿我先郵我水鄉廟於柵下以俟以禱  
二百五十年三斤舊字以底大光耄穉男女奔走祠事循禮有  
常億禩奉則神其永享 以底大光耄穉男女奔走祠事循禮有  
神其永享以福民無疆

觀音廟 一在靈應祠右 一在山紫舖涌邊 一在社亭舖竹欄號南禪

嘉慶丁卯重修 一在汾水舖善門街號南擊乾隆乙巳年重修

觀音堂舖沙塘大街號南瀾嘉慶己巳年重修 一在橋亭舖水

便嘉慶己未年重修 一在山紫舖田邊號南泉光緒口口口重

修 一在橋亭通濟橋號南濟順治乙未年白衣庵僧圓明以庵

改為南濟廟嘉慶丁卯重修 一在岳廟舖道姑園號南陰 一

在橋亭舖水便嘉慶丁卯重修 一在山紫舖涌邊杉地 一在富

南勝 一在錦瀾舖鑄鉗街光緒甲午重修 一在富民舖新涌口號

重建南擊菴記 大士之祠遍普天也所覆所載之際黃耆黃口之儔莫不肖像  
以事尊親同於祖廟蓋法雷頻震智月常圓若或使之也汾水



南擎菴起不知何許年圯不知何干日但見黍離稷穗風雨不除庇神君僅片瓦爾雖林可浮履可渡八萬四千臂目棲息於何有之鄉而安侑之道殆不然也倫君泰我等與鄉僧海福普來鳩工庀材經營拮据且不憚沿門持鉢而屬緣弁於余諸檀越亦欣然義助吉涓鉅細之務皆問於神今落成矣竹苞松茂鳥革翬飛是役也不日成之蓋神助也董是役者倫君泰我梁君清字洗君九寰崔君海屏夫有美不揚後何以勸故列其姓名巔末於左使後之君子知所自焉里人龐景人撰

**聖懽宮** 一在汾水舖南擎廟前祀觀音父母乾隆乙巳年重修 說詳官祀靈應祠聖樂宮後

**聖親宮** 在山紫舖田邊觀音廟側祀觀音父母

**東嶽廟** 一在山紫舖社地乾隆丙戌年重修 一在明心舖京果街地在塔坡岡故稱塔坡廟嘉慶丙辰年重修 一在普君墟鯉魚地在普君墟故稱普君廟 光緒戊戌五街重修

**龍王廟** 一在嶼岐舖嶼岐里光緒十四年重修 一在祖廟舖城門頭咸豐丁巳重修

**洪聖廟** 一在南海神舖長慶坊道光辛巳年重修 一在岳廟舖道姑園道光乙巳年重修 一在鶴園舖鶴園大街 一在岳廟舖道姑園道光乙巳年

**城隍行臺** 在豐寧舖萬真觀左雍正丁未年建規模宏敞香火亦盛事詳萬真觀注

佛山忠義鄉志卷八 祠祀二 三

按禮記伊耆氏始爲蜡天子大蜡八水庸居七泰之上六曰城復于隍隍水也城庸也庸與墉通詩大雅宗墉言言是也城池之神屬地元說者謂大蜡之七卽祭城隍之始其見于史者蕪湖城隍祠建於吳赤烏二年自是代加封號京城至郡縣以次立廟制如公廨判事如長吏唐張九齡杜牧輩皆有祭文傳於後世其他以祈禱獲祐者散在志乘不可勝紀故其祀較里社爲重今制祭厲以城隍神莅之明統也事屬官祀非民間所能私立吾鄉城隍廟稱行臺名義最合記曰明有禮樂幽有鬼神明不能治者幽得而治之固不爽也相傳紀信爲固始城隍灌嬰爲滎陽城隍以人鬼司地元亦理之不可解者而事有徵驗亦信所可信而已秦氏五禮通考言之最詳故摘采諸說折衷



其義著於篇

以上各廟俱載大清會典雖屬民祀地方官朔望行香或遇水旱癘疫皆赴廟行禮藉伸祈禳乃祀事之有關政教者惟字祖未入祀典漢文翁建學歷祀先儒援此為例沮倉為文字祖列在祀典國家禮亦宜之并注

龍母廟

一在柵下舖蟠龍街同治甲戌年修

龍母溫夫人者晉康程水人也秦始皇嘗遣使盡禮致聘將納夫人後宮夫人不樂使者敦迫上道行至始安一夕龍引所乘船還程水使者復往龍復引船以歸夫人沒葬西源上龍嘗為大波縈浪轉沙以成墳會大風雨墓移江北每洪水淹沒四周皆濁而近墓數尺獨清墓之南有山天將雨雲氣必先羣山而出樹木陰翳有數百年古木人不敢伐以夫人有神靈其間或云夫人姓蒲誤作溫然其墓當靈溪水口靈溪一名溫水以夫李姓溫故名或曰溫者媪之訛也夫人故稱蒲媪又稱媪龍唐子出焉養之以飲食龍得長大蓋古之豢龍氏也始皇以為神遣使迎媪以嘗聞徐福言海神之使者銅色而龍形光上照天意媪其同類也求三神山船既至風輒引去豈亦龍之所為耶

佛山忠義鄉志卷八

祠祀二 古

羣廟

按此亦龍神也龍能致雲雨澤萬物國朝已有祀典故龍母廟載入廟宇類 據邑志

張王爺廟

在橋亭舖村尾咸豐元年修

考神之名氏事蹟封號典禮具見元明兩代史志暨文獻通考以迄癸辛雜識能改齋漫錄留青日札等書而名亦難遽定然祀典之隆由來已久則王之功德遠暨東南不獨諏吉之靈已也 據道光邑志

普庵廟

在山紫舖南興里光緒庚寅修

普庵禪師俗姓余袁州宜春人六歲修行宋乾道五年涅槃宋封普庵寂感妙濟正覺昭貺禪師有廟在山紫舖

綏靖伯廟

在福德舖列聖宮光緒庚子建

三界聖廟

在富民舖三界通衢 一在大基舖迎雲里橫街嘉慶十七年修道光十九年重修坊眾有記

節錄三界廟碑記

三界聖神馮姓名克利祖龍泉公父元亮公原籍浙江紹興山陰東湖人龍泉公就右都御史韓雍內幕成化元年從征廣西猺賊大破諸蠻於潯州之大藤峽韓公晉爵兩廣總制仍留龍泉公父子在署主幕相得甚深九年會歲饑從韓公巡撫廣西同舟泊貴縣之東壘渡而龍泉公病篤越三日卒維時元亮公節哀盡禮即奉柩葬於東壘之黃嶺崗廬墓三年因家於是村聘邑舉人甘潤長女為室於弘治元年戊申歲四月初八日午



時聖降生焉嘉靖七年田州土蠻岑猛等糾眾為亂猺賊熾新  
建伯王守仁奉命征討之舟次東壘親詣聖家請聘參謀軍機  
賊眾平後聖即辭歸復優游林下偶往北山採香遇八仙對奕  
旁觀之俄見仙童送桃九枚仙啖其八餘一與聖又授無縫衣  
一襲及旋家則易多年鄉人驚異之凡言吉凶無不靈驗事聞  
有司疑其妖術惑眾提赴勘問將聖與次子遠覆以洪鐘外加  
烈炭三日啟之聖端坐如故而遠則灰化矣遂信為仙表聞於  
朝為遊天得道三界云比回至蒼梧江愛其地幽勝爰卜居焉  
後羽化莫知所終郡人立廟祀之靈感不替廟中青龍能辨人  
善惡香火最盛廟在梧州三角嘴道光十四年廣西巡撫祁項  
因禱兩屢驗奏請敕封敷祐伯六代聖孫都長公字福端貞吉  
公字汝康皆得道同塑神像供奉云云 道光己亥坊眾立石

按俗傳廣西有活三界神不經之甚有廟在大基尾汎旁  
及北勝街前鄉人多祀之舊志惟既膺受封號即載在祀典

與張王爺普庵廟事同一體故列入本志次於正祀之後  
餘皆叢祠另編如左

叢祠 分五類

周秦之間多叢祠秦之鄙時五時皆叢祠也說在史記吾鄉廟甚

佛山忠義鄉志卷八

祠祀二 五 羣廟

多其不在祀典及多神無主者統為叢祠以別於羣祠類編如左

鵲歌廟 在山紫舖鵲歌古蹟祀神農炎帝關帝伏波將軍先鋒嘉  
慶十年修道光十年重修別見風土志古蹟類

二帝廟 在東頭舖走馬燈乾隆甲子建光緒乙酉修

三官廟 祀天地水官在石路舖興隆里 一在觀音堂舖三官街

二聖廟 在橋亭舖黃礪嘉慶丙辰修

三聖廟 一在大基舖鯉魚沙同怡癸丑修 一在鷹沙咸豐辛亥  
修 二在明心舖三聖宮光緒癸未修 一在祖廟舖隔

塘三稔巷 一在  
冊下舖廟巷上街

四聖廟 祀太歲地藏等神在鶯岡光緒乙巳年修

列聖古廟 在祖廟舖文筆巷 一在祖廟舖鑿石中街道光十年  
建 一在福德舖列聖宮道光丙子修

以上六廟奉祀多神並無專祀中有尊神故類次在前

斗姥廟 祀斗神在祖廟舖西邊頭嘉慶十九年修

地藏廟 在山紫舖杉地側光緒十二年修



呂仙廟

祀呂祖觀音在柵下舖三元里建於光緒三十年

譚仙廟

在山紫舖南泉古道咸豐癸丑建譚仙名峭唐時人所著有譚子化書

二仙廟

在山紫舖和合街乾隆甲寅修二仙者俗傳樟柳二神也禱祀亦驗

以上五廟見釋典道經

帥府廟

一在大基舖大基尾一在柵下舖大塘涌光緒二十年

鑿石大街

咸豐十二年建一在柵下舖瀛洲街光緒十六年建

俗傳康元帥父康衢母金氏生於黃河之界負龍馬之精趙元帥名公明其神為元壇石元帥為五雷長皆北帝部將山紫舖

彩陽舖醫靈舖明照舖俱有元壇廟耆老舖錦瀾舖俱有主帥廟柵下舖有帥府廟二橋亭舖有石公太尉廟禱祀輒驗

太尉廟

在祖廟太尉廟道嘉慶丁丑建一在岳廟舖永豐前街咸豐九年建

按鎮內太尉廟三其各街設龕供奉者尚不在此數香火

亦盛牌位題敕封石公太尉陶冶先師石行及錫箔皮金

銅鑼鐵砧鑄鑊各行皆祀之亦不知石公何神封自何代

佛山忠義鄉志卷八

祠祀二 六

舊志謂即元壇廟石元帥可以互參

據采訪冊及值事開

真君廟

一在大基頭鯉魚沙一在耆老舖三多堂光緒丙子修

道光庚子

重修一在錦瀾舖鵝鳴里道光辛丑建一在真明舖白礮頭

嘉慶戊寅年重修一在彩陽舖大元巷一在大基舖華康里

按真君廟所在多有牌位分題道里真君康大元帥景祐

真君張副元帥均有封號本無經典可稽而香火甚盛許

旌揚亦稱真君祀江西會館

醫靈廟

一在豐寧舖鶯岡道光戊子年重修一在醫靈舖司馬坊嘉慶壬戌年

重修大墟嘉慶辛酉年重修

舖大墟嘉慶辛酉年重修一在觀音堂舖都司前乾隆丙午年重修一在觀音堂

自神農際草辨性保物濟用以補救夫天地陰陽乖沴之氣兩

扁鵲秦和神得是物理有醫靈萬壽帝然人之道絕續無常帝

民則祀之況淡人骨膚入人性情令天下之痛心疾首咸望於

紉憂如帝德者哉帝之香火遍界功及生民無往不在然在禪



痛以叩於帝者輒不惜調劑以度人厄且猶恐屬於冥冥參朮君臣復形乩教真不啻響酬而面命之是帝道保物而物得持帝同人而物愈得侍廟之創不知自何年昔之父老重修迄今復百餘載風雨漸瀝榭榭湮頽里之人食帝德因念神麻族兄秀日暨緣首洗應磨等集眾抒誠命工丹雘棟宇煥然其詠日選辰皆出乩授是帝之愛人無已則凡所以降福斯民消災弭厄者何所不至至於抱沈疴而望救則又其顯者矣故閭閻蒼首時疾痛呼天而天若弗及者惟帝及之童稚嬰兒時疾痛呼父母而父母弗及者惟帝及之將見夫陰陽乖沴之氣天地之所不能齊帝之力皆有以補之則帝之德蓋與二氣同不朽矣

順德趙鳴玉撰

華光廟 一在豐寧鋪通勝街 一在醫靈鋪牛乳基 一在鯉魚爛爐屋道光壬寅年修 一在福德鋪克巷道光戊戌年修 一在柵下鋪走馬燈 一在汾水正埠 一在汾水鋪疊滄渡頭 一在汾水鋪甘水渡頭 一在觀音堂鋪低街 一在山紫村口 乾隆辛亥重修

按俗傳華光為火神塑像作三眼形每歲九十月間各街

禳火名火星醮張燈結彩迎神莅壇連天賽會各街競鬪

繁華糜費頗鉅民國初奉令禁止商民遂將其醮費移祀

佛山忠義鄉志卷八

祠祀二 七 羣廟

聖誕因勢利導莫善於此而禪竈主祭私祀尙多智如國僑亦未能驟奪也

財神廟 在柵下鋪海口文閣左道光乙酉建 一在岳廟鋪岳廟

雷公廟 祀雷神在山紫鋪雷公壑乾隆丙午修

以上六廟道家稱醫靈華光為大帝財神為星君餘皆神

將

鬼谷廟 在富文鋪汾陽大街乾隆癸丑年建

先鋒廟 一在潘涌鋪快子街嘉慶甲子修 一在汾水鋪盤古直街乾隆戊子建 一在鶴園鋪鶴園前街道光甲申年重

修 一在社亭鋪新墟洪聖廟內 一在柵下鋪走馬燈乾隆

故事相傳先鋒為漢伏波樓船副將軍辛丑年重修 神尤感應號稱楊爺疑即楊僕見史記酷吏傳

將軍廟 祀伏波將軍馬援 一在潘涌鋪沙洛坊名鎮西將軍

南將軍 康熙庚子建嘉慶戊寅修 一在觀音堂鋪鎮南街名鎮 年修 一在山紫鋪拱北里順治王辰建道光庚寅



華陀廟 一在山紫舖南泉古道 一在鷹沙汎地尾

國公廟 祀唐鄂國公尉遲敬德在新安街光緒辛卯重修 一在鷹沙光緒壬午年修

以上五廟皆歿而為神者故事可徵以時代為次

金花廟 一在錦瀾舖石路邊光緒甲申修 一在嶼岐舖細巷同隆五十年建道光丙午年修 一在祖廟舖西邊頭

廣州志金花神廣之金氏女也少為巫時稱金花小娘後沒於仙湖之水數日不壞且有異香里人陳光見而異之偕眾舉殮

得香木如人形因刻像立祠祈嗣往往有驗祠毀成化五年巡撫陳濂重建稱為金花普主惠福夫人張詡顯詩玉顏當日觀

金花化作仙湖水面霞霞本無心還片片晚風吹落萬人家

舍人廟 在福德舖舍人大街宣統二年重修

梁舍人本福祿里梁氏子年十九往廣西販柴歸至中途颶風覆舟死而現形如生時僱舟引柴歸且日我桌臺舍人也舟不

得緩舟人晝夜趨行不數日至急登岸命舟子隨抵家則先入舟子久候不出因呼舍人門內驚問具言其故兼述體貌舉家

惶愕拉往驗柴則果泊岸矣方悟已溺死而為神也里人異其事立廟祀之祈禱輒應迄今不衰陳志

柳氏夫人廟 在嶼岐舖古石龍街同治十二年建 柳氏者俗傳金華之乳母求子亦有驗據舊志

祠祀二 六

痘母廟 祀痘神在山紫舖社地乾隆辛巳重修

張仙廟 在東頭舖走馬燈咸豐辛酉修 張仙即花蕊夫人所祀蜀主像鄉人相沿祀以求子

花王廟 祀花神在山紫舖地藏廟右嘉慶壬申重修 一在岳廟舖永豐社前乾隆辛酉重修 一在石路舖興隆里道光

丁亥修 一在觀音堂舖涌邊 一在岳廟舖祿豐社前乾隆五十七年建

粵人祈子必於花王父母有祝辭曰白花男紅花女故婚夕親戚皆往送花蓋取花如桃李之義詩以桃李二物與男女二人故桃夭言女也標梅言男也女桃而男梅華山上有石養父母祠秦人往往祈子亦花王父母之義也采訪冊

以上六廟求嗣保嬰者祀之金花舍人柳氏夫人皆土神

餘亦民間香火

大王廟 在大基舖煤廠下乾隆乙巳修 牌位題敕封威靈感應通天惠濟保民大王未詳

白馬將軍廟 在東頭舖聚福里

按俗傳該廟未建以前此地夜間有白馬現形故坊眾建廟於此塑像作將軍勒馬故稱曰白馬將軍為街坊公廟



飛雲廟

在鷹沙建於乾隆初所祀何神舊志所有故存之內座已拆毀僅存頭門一座不知

烏利廟

在鷹沙祀烏利將軍同治八年修牌位題雲陣押兵烏利大將軍

以上四廟不載經典實事不詳故附後

錄道光邑志按語一則

按壇廟入祀典乃編列志乘指地方官所建置與其歲修禋祀者言之如康對山武功縣志祠祀門可考也伏讀國家功令民間廟宇非請官咨部覆准不得擅建其防淫祀正人心者意甚深遠若魏志三界廟龍龜廟岳廟瓊花廟之類均非祀典攸係餘民間私祀不由官設者尚多但靈異久爲士庶所尸祀於祭法禦災捍患則祀禮文相符前人故特著於篇今仍而不削並擇採訪冊之香火豐腆百眾畏服者分堡增纂以爲黔首則斷毋戾於神道設教之旨云

佛山忠義鄉志卷八

祠祀二 十九 羣廟

論曰壇廟之制縣志言之當矣抑更有說焉三代上聚民以社古制既不可復而廟祀起坊眾有事多集廟議之其大者有廳事廊舍香火之資藉充公用團體之所以固結未嘗不賴乎此概以淫祀擯之甚且收沒變置民間無一公產協神人和上下之謂何哉因勢利導有權衡焉是故君子行禮不求變俗

里社 厲壇附

祭法共工氏有子曰句龍爲后土能平九州故祀以爲社烈山氏有子曰柱能殖百穀故祀以爲稷至殷以柱久遠而堯時棄爲后稷亦殖百穀故廢柱祀棄此社稷所自昉天子曰大社王爲羣姓立社曰置社不言稷統詞也大社尙已置社卽今之里社明會典里社之制凡各鄉村人民每里一百戶內立壇一所祀五土五穀之神每歲春秋二社里長莅厥事土神位於壇東穀神位於壇西



祭畢會飲先令一人讀誓詞文曰凡我同里之人各遵守禮法毋恃強凌弱違者先共制之然後經官婚姻喪葬有乏隨力相助如不從眾及犯姦盜詐偽一切非為之人不許入會誓畢長幼以次就坐盡歡而退於春祈秋報中寓讀法講約之意得三代之遺風矣舊志與地門鄉內畫地為舖舖各立社原本明制今舖份日增社亦非舊牌位統名社稷之神漸失古意而奉祀之誠婦孺無間善治者因神以聚民因聚以觀禮未始非易俗移風之道云編次如左以厲壇附

柵下舖

會源社 義裕社 鎮南社 聚源社 庇民社

忠義第六社 青龍社

東頭舖

佛山忠義鄉志卷八

祠祀二一 二十里社

東頭社 忠義第四社

明照舖

清洲社 洪聖社

橋亭舖

寶賢社 通雲社 保安社 保豐社

醫靈舖

萬壽社

彩陽舖

登閣社

嶼岐舖

癸向社 巷心社 中正社 樂平社 細巷社

耆老舖



朝南社 朝北社

錦瀾舖

君臣社 報恩社 第九社 會真社

仙涌舖

仙涌社

社亭舖

太平社 接龍社 大富社 石亭社

真明舖

洪靈社 青雲社 白雲社 真明社 平樂社

明心舖

明心社 宜興社 明安社

石路舖

佛山忠義鄉志卷八

祠祀二 三 里社

興隆社 仁興社

紀綱舖

鎮安社 繁露社

豐寧舖

坐地社 沐恩社 新安社

黃傘舖

富里社

祖廟舖

古洛社 忠義社 第一社 即麒麟社

山紫舖

東邊社 北約社 寶山社 中正社 南約社

岳廟舖



祿豐社 六村社 粥頭社 永豐社

福德舖

福德社 福安社 螺涌社 樂霖社

觀音堂舖

溇邊社 新安社 新增

大基舖

到向社 興民社 振安社 瓊芝社

汾水舖

聚龍社 安寧社 東勝社 顯應社

富文舖

朝陽社 靈應社 富文社 北勝社 西勝社

沙洛舖

佛山忠義鄉志卷八

祠祀二 三 里社

沙洛社

厲壇

大慈堂 在豐寧舖萬真觀左祀無依木主雍正五年建故事超幽

旅食祠 在汾水舖南擊廟後街即顏料行會館舊地乾隆三十三年建內安旅食諸公之神位事詳鄉事志及雜志里人陳

炎宗有記 旅食祠碑記

王右軍云死生亦大矣豈不痛哉夫修短隨化終期於盡固理之常耳猶不能無痛况非常凶診數百人殲於一炬可不為大哀乎余於旅食祠之建愴然有餘痛也溯吾鄉以福地稱堪輿家謂四炁伏藏永無災劫故自宋迄今類皆康樂壽考人歌得所嗟乎去歲丁亥十月之異胡為乎來哉夫會館演劇在在皆然演劇而千百人聚觀亦時時皆然迺顏料之會館顧獨蒙不測之災也釁發於祝融人迷於倉卒突前扉兮勿通奔後垣兮乏竅乘屋兮下牽不得升入井兮上擠不得掉層煙紛羅兮哀號烈燄飛騰兮狂叫魂膺亂兮失東西魄焦爛兮無老少痛矣哉天耶人耶傷心慘目有如耶仁人君子能不思所以平羣憾而妥羣靈耶為之葬埋穴相枕也為之懺薦岸同登也是足以平之妥之乎未也同死者五六百人宛若攜手同車攜手同行不得萃一室以處則熒熒其未安也為之創棟宇備堂寢俾旅居而旅食焉夫然後有所歸也斯祠之立非惻隱所結撰而



聯幽冥之情志也哉助資者既動於不容已經營者尤力以肩其成信吾鄉之多義人而恤災慰死之有合乎古也夫天地之大德曰生而凶疹之來乃緣氣數是豈不愛五六百命而付之一燼乎實出偶然之氣數不關人事也明矣况恤災為迂福之道慰死為保生之基繼自今吾鄉人益勉為善事庶俗美風淳世獲吉護則永無災劫之說未始不信而有微耳而斯祠之享祀不與之長存哉當火之明日余寓羊城鄉人以其事來告余方與客飲聞之驚悼遠投箸而起客亦愕然變容欲獻感歎因罷酒誠深痛而大哀之也豈第如右軍所云尋常之生死哉茲執筆紀所以建斯祠者猶痛從中來縈縈於楮墨間也祠建於汾水南擊後街經始於戊子歲之正月閱十月告竣深九丈八尺廣二丈七尺零門庭寢室皆宏整旁築一軒亦爽潔庖廚竈井皆甃石甃固楹棟構良可垂久遠其首事諸君暨捐助士女姓名弁列於左里人陳炎宗撰  
乾隆三十三年首事梁德灤

### 太乙廟

在柵下海口即火藥局故址光緒十年十一月月初六日被焚總辦及員役百餘人同時殉難鄉人就其地建廟以祀祠版題同難諸公神位設太乙壇前為亭大魁堂地志及雜志廟經毀爛今改石壇前為亭大魁堂地  
延祀祠捐建鎮地頻年癘疫水旱不時社壇土地祠丟棄木主極多二人購屋建祠祀之名曰延祀前後檢拾至七百餘位具有行列僱人守祠不收租值早晚香一炷燈一盞遇清明及七月孟蘭

佛山忠義鄉志卷八

厲壇

三

節備禮致祭至今不廢其在署時建有陳興公祠專祀衙役之客死無歸者是祠祀及無主孤魂志願尤大二人充當衙役多年裁撤後在近郊服農鋤地見骸殖發現培土掩埋行經僻路廢塚隨時檢拾埋於石灣三清岡義塚可謂好行其德矣

論曰傳云鬼有所歸乃不為厲故古有厲壇之祭大清會典載高

宗御製告文羅列厲鬼至數十種讀之令人悽愴蓋皆不得其死又無所歸其冤屈之氣動能為厲有壇以為之歸臨之以官而歲時展祀則乖戾消而祥和至矣所謂知鬼神之情狀者此也

### 寺

經堂在醫靈舖即古塔坡寺原在耆老舖塔坡岡上東晉時有西

法師達毘耶舍尊者因講經始建經堂堂後有岡相傳唐貞觀二

年岡地夜放金光掘之得銅佛三尊穴間有碣曰塔坡寺佛有聯

云勝地驟開一千年前青山我是佛蓮花極頂五百載後說法起

何人鄉名佛山蓋始於此寺毀於明洪武二十四年天啟七年復

建於醫靈舖即今地也或謂其佛乃過去世塔坡寺之佛或謂其佛乃舍利塔上所供之佛雍正九年潮省和尚祈請東莞寶曇舍利來始建鐵浮圖高一丈零八寸重一千八百餘斤藏舍利於塔下安古佛在塔中嘉慶四年僧敬來重建增高一丈八尺重七千



餘勛仿阿育王塔式吳志寺修於乾隆戊申咸豐甲寅毀於兵惟  
鐵塔歸然尚存寺產歸大魁堂保管香煙闐寂垂三十年光緒初  
鎮細潘太史衍鑿街桐王廉訪福康梁觀察都唐倡議修復華林  
方丈勤安為緇流領袖諸名士多與之遊約至佛山周覽揀度概  
然引為己任撥積存寺產租息歸之中外檀越均有施舍經始於  
光緒丁丑浣辛巳落成規撫踰於其舊值皇太后萬壽勤安入都  
祝嘏因將經堂與塔坡古寺故事詳陳於內府大臣相國福錕據  
情代奏奉詔旨賞龍藏全經暨珍物還鎮山門賜寺名曰萬壽塔  
坡禪寺命南書房繕寫頒發自是古剎重興名山有主勤安圓寂  
寺僧有不法者眾擁入毀其器具僧逃藏經被焚銅佛亦失所在  
無亦神龍見首不見尾其出沒不可方物者與今仍由大魁堂  
招僧主持亦不復收集徒眾故僧舍荒涼而有基勿壞保存名蹟  
守士官與有責焉碑記附

山以佛名誌所自也名佛者何相傳晉代有西域僧至此結茆  
講經僧尋西還其徒因購室而居號曰經堂地據省會上游五  
十里僅南海縣屬一小鄉耳當鄉初聚時鄉人嘗夜見其地有  
光燭天乃掘得古佛三尊并有碣曰塔坡寺佛遂以供之經堂  
建塔崇奉因名其鄉曰佛山嗣是日益蕃庶自唐宋元明以迄  
於今人稠地廣煙火十萬餘家凡仕宦之所往來商賈之所出  
入貨貝舟航之所聚集於是乎匯而且衣冠文物之盛幾甲  
全粵蓋駸駸乎海濱鄒魯矣丁未冬月余由西清奉命佐守廣  
州實隸乎此莅治後天早須雨借同駐防之都關張公名象履  
者躬謁各廟為民祈禱見所謂經堂者惟像與塔在餘皆敗壁  
佛山忠義鄉志卷八 寺祠祀二 三

頽垣但存舊址詢之寺僧父老僉稱自雍正九年重修後踵事  
無人風雨飄搖以至於是余不禁浩然增歎以興廢舉墜為司  
士者責況斯地為佛山肇基勝蹟豈可聽其久而遂湮耶且天  
下名都巨鎮與紛華富麗之區雖白氣脈使然皆莫不有神明  
之胃出其廣大肝蠶之靈以維持默相於其間乃能永隆而不  
替余考之志乘佛山自明以逮國朝甲第蟬聯富室櫛比近今  
數十年間科名殷戶槩遜於前夫根茂實遂本撥未傷理有固  
然今不若昔若職是故耳都闔張公慨謂余曰若本撥未傷理有固  
修焉可緩哉因亟勸余力肩此舉無何奉委解閩餉二十萬兩  
往返數月春初旋署張公復為余言余謬膺半刺事神治民職  
應分任夫何敢辭特以斯地廢墜已久重建工費浩繁非藉眾  
擎慮難猝辦張公曰是固易易積實可以為山集腋可以成裘  
佛山一鎮紳衿商賈林林總總於尋常醴會神功尚且不吝施  
予矧此舉為地方興利官既樂為之倡其生斯長斯與貿易於  
斯者亦誰不欲其地之利而不爭先恐後者無是理也抑不特  
此也佛山居省上游為廣南一大都會其地運之興衰東南半  
壁均所攸關是則經堂之建舉凡在粵之宰官薦紳皆宜踴躍  
勤事共成美舉將見祇園紺宇輪奐重新慧日照臨之下三江  
五嶺咸破休光寧第一鄉一邑而已耶余聞而憬然既而忻然  
曰公言誠善予愧不能文不足為誌諸君勸請以是勒之於石  
以作重修佛山經堂緣起乾隆戊申九月渤海葉汝蘭撰并書  
經堂落成

牟尼何年降井里長向荒煙臥不起一自寶光出塔坡以佛名  
山從此始山人嗜佛創經堂玉磬金鈴徹上方興廢從來迭相



倚旋見修竹橫破牆邇來恰沐仁風遍捐貲修飾法王殿層層  
布地綴黃金金光直射如來面鳥斯革兮翬斯飛澗洞柵水環  
禪扉十年前憶經遊處都似茫茫春夢歸只今徑闢羊腸曲禪  
堂十步九移目喜從市井得叢林巢鷓鴣一聲煙樹綠參差碧樹  
倚簷邊隔斷紅塵別有天古來名刹只如此奚用遠問香積前  
我來已禮千百相徘徊不去瞻遺像悟得圓通偈八千始信夢  
時同一幻呵嗟乎談經臺漸成荒陂倏爾光輝生故基百年人  
事知幾變揮毫聊續雜園碑

**仁壽寺** 在觀音堂鋪順治十三年僧仁機重修仁機另有傳

仁壽寺

吳奎光

石橋橫臥蟠彩虹清晨入寺聞疏鐘方塘半畝新鯉躍古佛臥  
壁蛛絲蒙方袍古衲恰退院茶瓜清話談元空清蟬報響萬籟  
寂如以定水懸當中顛當斷渡久不作波平不復鈴語風須臾  
粥魚報午飯齋廚一飽權朝饗果腹便作短睡夢與四大參  
無終數點花雨落不落蘊然一覺聞秋蛩

**德壽寺** 順治四年僧達睿由羅浮華首臺來佛山創  
建在嶼岐鋪慶源坊道光十一年犯事被毀

**宏聖菴** 康熙三年僧堯羨建  
在豐寧鋪新安街

**三元寺** 康熙六年僧佛裕建在祖廟鋪  
三元市嘉慶九年僧秀文重修

**湖峯寺** 寺枕高基腰環帶水古樹凌霄羣芳向日僧翻貝葉  
百鳥和鳴康熙八年僧際端建在山紫鋪高基坊

佛山忠義鄉志卷八

祠祀二三五

**借菴** 康熙十七年僧亦堂  
建在錦瀾鋪網華里

**別院** 古樹參天野花映日幽靜為諸寺冠康熙十八年僧渠我  
建在觀音堂鋪聚慶坊道光十年僧元機募緣重修今廢

**鹿峯** 康熙丙午年僧大車建在岳廟鋪  
仲天坊咸豐五年改建岳廟公所

**豹菴** 康熙二十三年僧雨山自捐衣鉢資創建在  
錦瀾鋪網華里現名大甕巷今廢為桑地

**西菴** 門外旗帶水四面環繞前控南泉右接湖峯暮磬晨鐘鏗然  
相應康熙辛未年羅定州長春寺僧濟溥建在山紫鋪高基  
坊嘉慶六年僧贊西重修

**龍池菴** 康熙三十八年僧雲谷募建在錦  
瀾鋪沙濬大街現改錦瀾公所

**竹院** 康熙三十九年僧十  
洲募建在錦瀾鋪

深院竹風開清秋客與來劇憐淹旅夢遺恨泣荒臺寒食春煙  
鎖重陽暮雨回老僧居不俗且把菊花杯 李鳳陽

**蓮子菴** 康熙四十二年建  
在山紫鋪蓮子坊

**福壽菴** 雍正六年僧本大紹芳全建在祖廟  
鋪恩光里嘉慶九年僧貫禪重修

**觀音堂** 康熙四十六年僧奕輝重修嘉慶四年同知李永青都司祁世  
三十九年僧奕輝重修嘉慶四年同知李永青都司祁世



和重

慈隱菴 雍正九年建在柵下舖廣德里乾

明隱菴 雍正十一年建在柵下舖現無

定覺菴 順治八年建在福

鐵佛菴 又名僧伽廟崇禎丙子年

通濟菴 在橋亭舖

三昧菴 在橋亭舖

觀音堂 在祖廟舖舊在祖廟之左洪武八年改建崇正社學遷

福源菴 在祖廟舖

吉祥菴 在祖廟舖

茶菴 即今敬字亭

地藏菴 在山

佛山忠義鄉志卷八

祠祀二 美

寶洲禪院 在對海文昌沙武帝廟後

觀

萬真觀 即洞天宮在豐寧舖鶯岡之麓康熙癸巳年羅浮山冲虛  
人購地重建左為大慈堂以祀無依木主雍正丁未遊魂不安怪  
異屢見乃奉都城隍神以鎮撫之佛山之有城隍行臺肇此也護  
法者眾結構漸增三元殿呂祖殿斗姥殿峙其東洞天宮十王殿  
文武殿太乙樓洗心亭清水池繞其西四方雲遊道侶咸駐足焉  
邑人倫之綱有記據觀內碑文節增舊志

禪之南隅有土岡焉鶯其名也其地原隰異形西之數十步茂  
林矗空蔓草連徑中建洞天宮即古之萬真觀也庚戌花朝之  
候余偕鍾子元英舒子裕琪過訪梅石乃英之中表兄弟也  
其人磊落不羈寧靜寡慾雖尚英年而向道之心彌篤其師岑  
鐵松龍門正派由羅浮而住持此宮發願創建斗姥寶殿余甚  
嘉之因顧梅石而謂曰易云聖人以神道設教而天下服神化  
無方洋洋如在人承事者有願斯通有求斯應有災病疾痛  
呼籲斯去云胡不服禮曰聖王之制祭祀也德施于民則祀之  
能禦大災則祀之威靈赫濯保乂斯民使其鄉有康阜之祥有  
斯士太乙雷祖以威靈赫濯保乂斯民使其鄉有康阜之祥有  
詩書之澤有極非能去災患而施德于民者乎其祀之有廟也固



宜茲天尊故殿汝何不新而廣之增其法相竭力以為余偕鍾  
舒二子為汝佐也師曰唯唯於是募緣一倡人皆樂助經營於  
是歲之夏越月告竣馬復拉余私心竊幸以為神之所憑依將  
巍峩法象端嚴令人起肅余私心竊幸以為神之所憑依將  
斯矣而威靈視昔尤加又誰不受明昭之賜哉嗟嗟昔為荒隴  
今為梵宮昔為樵牧之場今為修真之所真所謂神道光顯能  
役使羣動而地效其靈人勸厥美者也因而問誌於余余素邀  
神貺佑啟文明耄而益壯知正直惟神保乂賜我福善禍淫毫  
髮不爽遂敘其始末以勒諸石云  
知河南開封府儀封縣事邑人倫之綱拜撰  
廣州府新會縣儒學教諭里人梁叶千書丹  
勅建北直白雲觀丘祖龍門正派第十七代梅石道子梁教  
敬募雍正八年歲次庚戌桂月穀旦洞天宮住持鐵松道人  
岑合順立石

### 玉泉仙館

在豐南舖蘭桂坊本南園舊址咸同間李文田侍郎結  
詩社於此侍郎供職京華諸名士風流雲散詩社既歇

園亦荒廢民國初居士呂鏡雲與戴鑿天孝廉魏伯揆茂才就其  
地改建仙館中座祀孔子樓上奉純陽子額曰儒真隱然有學道  
修真之意廣約三畝墉垣四週柵門首題曰玉泉古道道派與西  
樵雲泉仙館相接規畫佈置道長周詠生與有力焉李侍郎外甥  
麥晴峯議復詩社宗風賴以弗墜館內隨地結構有臥雲閣得月  
臺求志軒養眼室通幽徑諸勝引水為池畜有頰尾鯪鱖鱗鯽  
池種植有龍牙蕉鳳眼果綠筋黃竹紅葉紫茄常供採擇人以  
小桃源市鎮得此人境雙清亦足增勝地云馮登瀛碑記附  
佛山忠義鄉志卷八

祠祀二  
觀  
三

### 采訪

#### 佛山玉泉洞儒真仙館碑記

佛鎮繁盛之區也繁盛必喧闐喧闐必雜選欲於喧闐雜沓中  
關一靜境以為求志養神之所誠夏夏乎其難之乃有呂君鏡  
雲者鶴山縣維整鄉人也自少慕道曾結廬於田心里聲應氣  
求地嫌嶽隘於是偕其道侶張君少波等十餘人相與經營尋  
覓地段數載弗獲後蒙祖師示鶯岡之畔蘭桂坊裏有一南  
園廢圃地可通融往觀形勢隱約蟠龍追尋氣脈秀毓靈鍾購  
成數畝廓其有容蕩平瓦礫鞏以垣墉外人罔覺曲巷潛通塵  
埃絕卻壺嶠幾同斯誠不易得之幽靜境也於是營道同術合  
志同方招徠善信協力助勸集貲創建興作弗遑北營道同術合  
鑿方塘波澄月印雲影天光即此佳勝業已稱良且又通衢道  
以匯水源築花基而環香徑戶牖取其疏藩籬編以密青雲夾  
巷綠靄凝林當則宮闕巍峩崇祀孔聖呂仙顏其額曰儒真  
仙館尊儒術重真修也街外門首號玉泉古道萃清流登道岸  
也惟是館雖眾友助成地實因君送玉泉古道萃清流登道岸  
遂陞於甲寅規更宏於丁巳蓋館右青雲巷側屋宇一連四座  
及屋後菜地原屬呂君管業僉云洞內物有私產難普大同星  
移物換隙末凶終事須策畫務底至公於是黃君見二陳君晉  
廷等廿餘人同心商議合力維持多方集款購買為宜呂君亦  
熱心公益甘讓無辭由是全歸公物共慶無私幸能葺事規則  
永垂爰為之歌曰斯館之建呂君為之先斯館之立同人策其  
全今而後大中至正盡屬無偏箴規常共勵氣誼自相聯道可



修乎平易奚事遯跡於層巔他日進而愈上端有望於後賢歲次屠維協洽夷則月涼颯乍至仙帆氏馮登瀛撰於儒真仙館蒲桃樹之南軒八月六日在參藥會館跪石面上書丹時年七十三歲 民國八年己未仲秋同人等勒石

按官府治事之所謂之寺故九卿亦曰九寺自漢明帝使蔡愔等招摩勝入中國白馬馱經止鴻臚寺遂置寺曰白馬是為佛寺所由始其小者謂之庵觀亦古宮闕之名至漢武帝以仙人好樓居築蜚廉樓觀而觀遂專屬道家矣鎮內舊志寺觀二十九間今存一十六間其餘十三間或沒收入官或改建公所或廢為桑地或轉售他人非復故蹟惟沿革所關仍注明事由以備稽考

各國教堂表

堂會名	所在地	教系	建設西曆年	主教國籍
循道會	永興街	耶教	同治元年 西一八六二年	中英
同上	迎雲街	同上	光緒十二年 西一八八六年	同上
同上	太平坊	同上	光緒三十年 西一九零四年	同上
同上	文昌沙	同上	宣統二年 西一九一十年	同上
同上	廣德里	同上	民國九年 西一九二〇年	同上
基督教會	走馬路	同上	同治二年 西一八六四年	同上
公理會	西便巷	同上	民國八年 西一九一九年	中美
五節會	錦豪里	同上	民國七年 西一九一八年	同上
安息日會	石路頭	同上	光緒三十二年 西一九零六年	同上
福音堂	雞蛋地	同上	光緒三十二年 西一九零六年	同上
天主堂	洪安里	同上	光緒三十二年 西一九零六年	中法

佛山忠義鄉志卷八

祠堂

二

